



پہاڑی افسانوی مجموعہ




شیخ آزاد احمد آزاد
سُورن کوٹ (پونچھ)


بِسْمِ اللّٰهِ الرَّحْمٰنِ الرَّحِیْمِ ۵



درد



پہاڑی افسانوی مجموعہ



شیخ آزاد احمد آزاد

سورن کوٹ (پونچھ)



"DARD"

PAHARI AFSANVI MAJMUA

Shaikh Azad Ahmed Azad

Year-2012

@ اس کتاب "درد" نے جہلم، بٹن، ویڈیو تہ آڈیو پیس کر کے سارے حق مصنف نے ناں محفوظ ہیں۔

کتاب ناں: "درد"

مصنف: شیخ آزاد احمد آزاد

سن اشاعت: ۲۰۱۲ء

قیمت عام ایڈیشن: ۴۵۰ روپے

لاہوریری ایڈیشن: ۵۵۰ روپے

کمپوزنگ اترین: شیخ درخندہ آزاد گرافکس سون کوٹ (پونچھ)

مطبع: جے کے آفسیٹ پرنٹرز، دہلی

کمپوزر: شیخ آزاد احمد آزاد سون کوٹ (پونچھ)

رابطہ: موبائل نمبرات: 8803637160, 8803637156

پتہ: شیخ درخندہ آزاد پبلیکیشنز سون کوٹ (پونچھ)



انتساب



✽ ربِّ ذوالجلالِ نیاں بخشیاں نعمتاں تہ نہی کریم ﷺ فی سونہی تہرتی
نیاں معطر ہواواں نے حضور۔

✽ امی، لکھتہ مرطہ رفیقہ حیاتِ نیاں یاداں فی نذر۔

✽ ساری دُنیا نے مجبور، مظلوم، لستے، ماندے نالے دبے دبائے لوکاں نیاں
بستیاں نے ناں۔

✽ ضلع پوچھ نے ادہباں، فنکاراں، تہ دانشوراں نیاں ادبی سرگرمیاں
نذر۔



شیخ آزاد احمد آزاد

سورنگوٹ (پونچھ)



(تعارف)



نام: شیخ آزاد احمد آزاد

ولدیت: شیخ عزیز الدین

سکونت: سموت، نورکوٹ (پنجہ)

تاریخ پیدائش: ۱۷ اکتوبر 1948ء

تعلیم: بی اے، بی ایڈ، اردو آنرز (امتیاز)

پیشہ: ریٹائرڈ ڈپٹی ایجوکیشن آفیسر

مشغلہ: شاعری، نثر نگاری، پہاڑی، گجری، کشمیری، اردو، پنجابی

تصنیف: ششے پیاں کندھاں (پہاڑی شعری مجموعہ)

اگ ایسے (پہاڑی شعری مجموعہ) ”درد“ (پہاڑی افسانوی مجموعہ)

تکوس (گجری شعری مجموعہ) ”مجبوری“ (گجری افسانوی مجموعہ)

زیر طبع کتب: دنگاں (پنجابی شعری مجموعہ) ”پوش“ (کشمیری شعری مجموعہ)

حادثہ سنہ زندگی (اردو شعری مجموعہ)

بچہ تارا (اردو افسانوی مجموعہ) ”انصاف“ (اردو ڈرامہ)

ایوارڈ: بہترین استاد حکومت جموں و کشمیر ۱۹۹۶ء



ترتیب



- ۱ مائیکل
- ۲ کتاب نے بارے
- ۳ انتساب
- ۴ تعارف
- ۵ ترتیب
- ۱۰ ماہڑی گل
- ۱۶ پہاڑی لکھاریاں کی اک راہ نثار رائی راجوری
- ۲۶ آزاد صاحب کا افسانوی مجموعہ ”درد“ ایک نظر حاجی نذیر قریشی (گورساہی)
- ۲۸ گلوں گل ڈاکٹر فاروق انوار مرزا
- ۳۳ سانچے درد دی عکاسی آزاد دے قلموں راجہ نذر بونیاری

روانٹی افسانے

- ۴۰ ہمت

- ۴۸ وعدہ ❀
- ۶۲ عملوں فی مار ❀
- ۶۹ اوہ سن ترے ❀
- ۷۶ مجبوری ❀
- ۸۶ پالپسی ❀
- ۸۷ کمال ❀
- ۹۶ غیرت ❀

❀❀ افسانچے ❀❀

- ۱۰۴ لفافہ ❀
- ۱۰۶ گچھ تہ لحاظ کر ❀
- ۱۰۷ سگر میٹ ❀
- ۱۰۸ دو فرق (۱) ❀
- ۱۰۹ فرق (۲) ❀
- ۱۱۰ انہاں کولوں تہ پچھو ❀
- ۱۱۲ سوسوفون ❀

- ۱۱۳ ❁ سب کچھ ٹھیک ہے
- ۱۱۵ ❁ ادیب
- ۱۱۶ ❁ خصلت
- ۱۱۸ ❁ چل ہٹ
- ۱۲۰ ❁ نکاح
- ۱۲۲ ❁ بانی نے سو
- ۱۲۴ ❁ لحاظ دار
- ۱۲۶ ❁ کروت
- ۱۲۸ ❁ احساس
- ۱۳۰ ❁ عادت
- ۱۳۱ ❁ ووٹ
- ۱۳۳ ❁ نجات
- ۱۳۴ ❁ پسند
- ۱۳۵ ❁ شیخ شیخ سو
- ۱۳۷ ❁ سناکھ ناساہ
- ۱۳۹ ❁ فرق

- ۱۴۱ داتہ پچ
- ۱۴۳ فرمت
- ۱۴۵ روزہ تہج
- ۱۴۷ کہلا
- ۱۴۸ آخری دپدار
- ۱۵۰ پاگل
- ۱۵۱ شان
- ۱۵۳ اگلی دنیا
- ۱۵۵ تہذیب ناجنازہ
- ۱۵۷ کہن چکری
- ۱۵۸ احساس فی دنیا
- ۱۵۹ سچ فی سزا
- ۱۶۱ باڑھ نگلی گئی
- ۱۶۳ مرنے دوغڈ ارتھا
- ۱۶۴ بڑے لوک
- ۱۶۵ ہندو جگھ تہ مسلمان بانہہ

۱۶۷..... ڈائپر

۱۷۰..... نتھ

۱۷۳..... اڈھالفظ

۱۷۴..... درگور


۱۷۵..... دوہر اس ڈاٹا

۱۷۷..... واسطہ

۱۸۰..... دوگلاں



ماہڑی گل



اپنی عمرے نادسواں پاہنگا چڑھنیاں ہی سماج نے اندر چو کھٹھی
 نظر ماریاں ماریاں اک دن اجیہا واقعہ پیش آیا جس سن ماہڑی زندگی
 نے سارے ٹھیکے پیچ کسے در مجبور کھتاہ اندر نے آدم سن جس کدے
 مکی فقیری نی زندگی بسر کرن واسطے چکرؤڑیا سا تھوڑی جیہی ٹھیکل دیسی
 آکھیا ”ٹھیک ہے جے اس رستے ورٹرنے نا تو اہڑا ارادہ بنی ہی گیا
 ہے تہ اسراں دوئے کم سولے ہوسن، ور شرط ایہہ ہے جے ادھر راہ جانی
 کدھرے آپوں ہی اپنے رستے کی اوکھے تھیں او ہکھانہ بنایاں۔“ فر
 کہ سا.....؟ اندر نا تخلیقی آدم جیہڑا پہلاں ہی حالات تہ
 واقعات تھیں سخت متاثر سا اُس کی تھوڑی ہو رمد لہھی تہ فر ہر اوہ گل
 جیہڑی سامنے آئی اُس کی نثر تہ نظم نی صورت پنج پیش کرن نی کوشش

شروع ہوئی۔ شاعری تھیں ہی ماہریاں نثری تحریراں نی
 کہانی چھمراں نیاں پھواراں، پلپلیاں تلیاں، ٹھوکاں تہ بہکاں
 نیاں موج مستیاں کی کہٹ ور ٹھنکا کے ٹھیریاں نیاں ٹھوکر اں، ٹھینے
 اٹھنے لوکاں، جبر نے پھانڈیاں نال اٹے تہ لولے ہوئے مسکیناں تہ
 مجبور اں نالے بیکساں نیاں عرش ور بچنے آلیاں چانکاں، کالے کالے
 چھڑواں بچ ہونے آ لے ظلماں اٹہ نکلیاں لوکاں نیاں تھرتیاں چھلنے
 چھلنے گذریاں عُمر اں، اپنیاں نے کچھاں پیٹھ چھریاں، غیراں نیاں
 سازشاں تہ زمانے نے تتلوساں نال لوسی لاسی تھرتی نے بسپکاں
 نے زخماں نے کھرٹداں کی کھر یڑن ناکم شروع کیتا۔ اس سفر بچ
 مشکلاں، مصیبتاں تہ سازشاں نے کتنے ریلے آئے ہوسن اس نا
 قارئین حضرات کی چنگی طراں اندازہ ہے فروی اللہ پاک نالکھ لکھ شکر
 جے اندر نا تخلقی آدم جا گنار ہیا تہ حوصلہ وی دینار ہیا۔

اس افسانوی مجموعے ”درد“ اندر ہر قسم نا دکھ تہ درد لمبھی جیہڑا

صرف خیالی درد نہیہ بلکہ ایہہ سارا درد ماہریاں اکھیاں تکیا تہ

دلے محسوس کچھا۔ اس مجموعے مناسب تھیں بڑا مقصد تعلیم کی عام کرنا تہ اپنے پیراں پہنا رکھلا ہوئی ظلم نال مقابلہ کرنا مقصود ہے۔ اس جذبے بچ کیتی کامیابی حاصل ہوئی ایہہ قارئین حضرات تھیں زیادہ کون جانی تہ پرکھی سکنا ہے؟ اس تھیں علاوہ سماج نے ہر پہلو تھیں ہنی کہراں اندر ہون آ لے حالات تہ واقعات نی عکاسی نی کوشش کیتی ہے۔

میں انتہائی شکر گزار ہاں اُنہاں دوستاں، ادیبیاں، شاعراں، دانشوراں تہ قلمکاراں نا جنہاں قدم قدم ور ماہری حوصلہ افزائی کرنے بچ کوئے کسرباتی نہ چھوڑی نا لے ماہریاں لکھتاں بیاں تعریفاں نے پل بنھنے بچ وی اپنا کردار ادا کری جتھے ماہری حوصلہ افزائی کیتی اُتھے ہی کچھ ہو ر لکھنے نا مگی سادا دیتا۔ حالانکہ میں اس قابل نہیہ تہ نہ ہی اجاں ادب نے ڈوہنگے ڈوہنگیرے سمندر بیاں چھلیاں نا تارؤ بنی اپنے آپ کی بچائی سکناں۔

جناب نذیر قریشی گورساہی آ لے جیہڑے اک مئے پر مئے ادیب

تہ قلم کار نالے شعلہ بیان مقرر ہین، سن ماہڑیاں انہاں نکلیاں
 نکلیاں کہانیاں بارے جو کچھ عطا کیتا اوہ ماہڑی زندگی ناسب تھیں بڑا
 سرمایہ ہے۔ جناب نثار راہی راجوروی کی میں ہر کہڑی تنگی دتی تہ
 انہاں کدے وی اپنے سوہنے متھے کہڑ وٹھ نہ باہی۔ میں انہاں ناوی
 بے حد شکریہ ادا کرنا اپنا فرض سمجھنا ہاں۔ جناب ڈاکٹر فاروق انوار مرزا
 ہوراں وی قلمی نورنا اوہ بدل برہایا جے ماہڑے کلیجے ٹھنڈ باہی اپنے
 واسطے دعاواں ناٹھڑ سمری، سوتی تہ سمہالی اپنے نال اک پنڈھ تھئی ہنی
 گئے۔ جناب نذر بونیاری جیہڑے ملکی پیمانے نے ادیب ہین۔
 انہاں وی ماہڑے جے ناچیز واسطے جو کچھ لکھیا اوہ انہاں نا بڑا پن ہے
 ورنہ ماہڑی کہ مجال.....؟

درد افسانوی مجموعے تھیں علاوہ مچ سارے افسانے کتابی شکل
 بچ آن واسطے کھلے تلے اڑ پکے ہین، جے اللہ حیاتی بخشی نالے اُس
 چاہیا تہ فرسنگیاں ساتھیاں نیاں اسے طراں مہربانیاں شامل حال
 رہیاں تہ جلدی اوہ وی ٹساں نیاں نظراں تھیں گذری

تساہریاں دُعاواں ہنسن۔ اس کتاب فی ترتیب اندر ہر قسم
نی خامی نظر انداز کرن فی قارئین تہ نقاد حضرات کی گزارش کرنا
مناسب سمجھنا ہاں تہ مگی اُمید ہی بیہہ پکا یقین ہے، جتھے اوہ ماہری
حوصلہ افزائی کرن اُتھے اپنے قیمتی مشوریاں تھیں وی نواز نے نا حوصلہ
افزادہم چان بچ پہل کرن۔


خدا کرے ماہری ایہہ ادنیٰ کوشش مظلوماں تہ مجبوراں نالے
مسکیناں نیاں زخماں فی جتھے مرہم ناکم کرے اُتھے ہی جوناں نیاں
زندگیاں نے حوالے نال اُنہاں کی اگے بدھنے نے ہر موقعے کی
ہتھوں نہ جان دے۔

آخر بچ ساریاں ناشکر یہ ادا کرنا اپنا فرض سمجھی اک گزارش کرنا
ہاں جے ہر قاری کی حق حاصل ہے کہ اوہ جو سمجھے، پرکھے نالے اپنے
قیمتی مشوریاں تھیں نواز نا چاہے، اس کی میں اک احسان سمجھساں تہ
اُنہاں مشوریاں ور عمل کرن فی کوشش وی کرساں۔ انشاء اللہ
مکی پٹی امید ہے جے ماہریاں روائتی تہ مٹی کہانیاں قارئین کی

پسند آسن تہ فر ماہڑی حوصلہ افزائی وی ہوسی تہ دلے نے
 ارمان وی پڑے ہوسن۔ خدا تئساں ساریاں نیاں عمر اں لمیاں کرے
 تہ سدا خوش نالے خوشحال رکھے۔ آمین۔

شیخ آزاد احمد آزاد

سورنگوٹ (پونچھ)



پہاڑی لکھاریاں کی اک راہ، اک سِلک تہ اک مزاج دین
آلا شیخ آزاد..... نثار راہی راجوری



آزاد صاحب بنیادی طور کشمیری النسل ہیں۔ اجاں
وی کہنر پنج کشمیری زبان رچی بسی ہے پتہ نیہ اوہ کدوں گوجر بنے تہ
گوجری ناچنگا چو خاسر مایہ ٹھیٹھ گجرب و لہجے تہ مرکبات نال پیش کر کے
گوجری ادب نی قابل لحاظ حد تک خدمت نا بیڑہ جھنکیا۔ حالانکہ
انہاں نے قلم تھوں کشمیری پنج جیہڑی انہاں نی ماں بولی ہے کما حقہ
کوئی خدمت نہ ہوسکی۔ مقامی سیاست نے جتھے زبانناں کی وی تقسیم نا
ذریعہ بنا کے رکھیا اُتھے ہی اِس طرح نا کم لائق تحسین وی ہے تہ انہاں
نی علمی بصیرت، حقائق شناسی تہ ادبی شغف نا اندازہ وی ہونا

ہے۔ ایہہ عمل وی باعثِ تعجب ہے جے انہاں نے پہاڑی زبان بچ وی گراں قدر سرمایہ شعری تہ نثری رُپ بچ پیش کر کے اپنی مناسب تہ معتبر جگہ بنان بچ کامیابی حاصل کیہتی ہے۔ انہاں نے قلم فی کشمیری توں بعد اُردو نے پاسے روانی فی سمجھ آنی سی، وراہہ اپنی خدا داد صلاحیت وی اُدھر اس حد تکر نہ موڑ سکے۔ پتہ نیہہ اوہ کیہڑا جذبہ سا یا احساس، جس نے انہاں کی پہاڑی زبان بچ شعری سرمائے توں بعد نثری ادب پیش کرن واسطے اُکسایا۔

بہر حال آزاد صاحب ہمہ جہت شخصیت نے وارث ہن۔ اوہ راجوری پو نچھ نے مخلوط سماج فی پہچان ہن۔ ہر قسم فی تنگ نظری، تعصب تہ تکلیفی نے جغرافیہ توں اگے بدھ کے ادب کی پروان چڑھانے نامزاج اپنائے ہوئے ہن۔ انہاں نے کول ایہہ سماج اک کہتر انا، اک کنبہ تہ اک شناخت ہے۔ ایہہ میں تہ تو نے جھنجھٹاں توں ہٹ کے رواداری نے نگلہ ستیاں کی سجا کے اس نے رنگ تہ رُپ نے تجارتی ہونے نا طریقہ اپنائے ہوئے ہن۔ انہاں نا

شعری سرمایہ وہے یا نثری، مکمل عبورِ تہ مکمل ادراک نا
اظہار انہاں ناحصہ رہیا ہے۔ میرے خیال بچ راجوری پونچھ یا اس
طرح نے دُوے سرحدی علاقیاں بچ ایہہ واحد شخصیت ہین جو معیارِ فی
ترکھڑی ورثلیا ہو یا سرمایہ پیش کر رہے ہین جس بچ ساری صنفِ ادب
نا دخل ہے۔ آزاد صاحب نا تازہ ترین افسانوی مجموعہ ”درد“ ناظرین
فی ضیافتِ طبع واسطے منظرِ آچکلیا ہے۔ اس مجموعے بچ ۶۹ افسانے
ہین جنہاں بچوں پہلے اٹھ افسانے نمبردار نے آس پاس ہی پھرنے
ہین۔ جس توں اک وقت نے جبر تہ تشدد فی چہلک لکھنی ہے۔ نمبردار
اصل بچ انہاں بچوں ”کانے راجے“ ہارؤں اک سرمایہ داری فی
علامت ہے۔ جیہڑی کجھ وقت تک نمبردار، ذیلدار تہ بندھدار نے ناں
نال سی۔ فرسیاست نامزاج بدلیا تہ سر بچ، حلقہ صدر، ڈیلیکیٹ تہ کامریڈ
وغیرہ زبانِ ذِ دِعام ہو گئے۔ ایہہ وی اک استحصالی نظریہ پیش کرنے
رہے۔ فر انہاں توں بعد دُوے لوک نمبر منتری وغیرہ وی اس ترکھڑی
نے کسے پلے ورثکنے لکھے۔

جدوں آزاد صاحب شروع شروع پنج پہاڑی۔

زبان پنج افسانے نے حوالے نال باندے آئے تہ انہاں نال لب ولجہ
منشی پریم چند ناسی۔ جس پنج حقائق کی دُور بین تہ خورد بین دوہاں نال
پرکھنے نی انہاں فی عادت سی۔ جدوں ایہہ بڈھی مائی نے اثاثے نا
حساب کرانے پین تہ انہاں بستیاں نے دُور دراز کچے کوٹھے پنج بیٹھی
اک بڈھی بیوہ فی تصویر نہایت دیانتداری نال پیش کرنے پین تہ اتھے
ادب برائے ادب فی بجائے ادب برائے زندگی فی Diction نا
پرودا پکڑی کے اس ادب نیاں زلفاں سنوارنے پین۔ انہاں
افسانیاں پنج وی اوہی صفت عددی نا پہاڑہ دہرانے رہنے پین۔ جس
طرح دو پچھیاں چار منجھیاں، اٹھ پھینڈاں، ترے گائیاں تہ بیہہ کلڑ
فر ڈنگر چارن واسطے اک نوکر وغیرہ۔ ایہہ اوہ سلسلہ ہے جیہڑا ماضی
قریب پنج نمبر دار نے حوالے نال عام سی۔ اک ہو اس قسم فی عبارت
تکو ”نمبر دار ہو راں ماہڑی اک نہ منی، الٹی لہر کیتی تہ میں اُسے دن سلیم
تواہڑے پھڑاؤ کی نمبر دار ہو راں نے ڈنگر ڈکنے واسطے

پہنچیا۔ تو اہڑے پہاڑے بہشتی نے مرنے آ لے روز سخت مجبور
 ساں تہ میں فر اک من تہائیں آندے“ کدے حمید ولد حشمت
 پوزیشن لینا ہے تہ نمبردار نی گڑی خالی پاس ہونی ہے، اجیہاں گلاں
 اس نظام نی منہہ بولنی تصویر پیش کرنیاں ہین، جس نی وکالت ارسطو،
 افلاطون، مارٹن لوتھر گنگ، ہٹلر، مسولینی تہ لوئیس پاسچر بڑی دلیری نال
 پیش کر چکے ہین۔ ادھر کلیسا (سرمایہ دار) ناجبر تہ ادھر:

”لڑا دو مولے کو شاہباز سے“ (اقبال) نا آفاقی پیغام۔ ایہہ
 کجھ ملیا جلیا مواد آزاد ہور اپنی علمی تہ ادبی بصیرت نے ناپ نال پیش
 کر رہے ہین۔ انہاں افسانیاں پنج نمبردار نے نال نال ”بڑی سرکار“
 وی نمودار ہونے رہے جہاں نامشن وی اوہی سرمایہ داری نظام نی
 دیکھ رکھی سی۔ اسے واسطے ”اوہ سن ترے“ افسانے نامغز اس گل نال
 ہے جے سرمایہ دارٹساں کی لڑانا ہے۔ اوہ اپنے مفادِ خصوصی نی خاطر ہر
 حربہ کرسی ورتس ہندو، مسلم تہ سکھ گمراہ نہ ہو یو! ڈٹ کے باہمی میل
 جول نال زندگی گذار یو! ”مجبوری“ پنج رضیہ نی غربت، افلاس

تہ لاچارگی نا طور طریقہ ملنا ہے، ورا تھے وی نمبردار ہور پھٹنے
 نیہہ ”مکی دہس، پہانویں مکی نمبردار ہور جیل کرائی چھوڑن ور میں اُس
 کی زندہ نیہہ چھوڑ ساں جس ماہری تھی رضیہ کی چنگا مندا آکھیاو ہے“
 اک ہور افسانے ”پالیسی“ پنج اس دور نا نمبردار تھانیدار نے روپ پنج
 آئی جُبنا ہے، تہ اس نارول وی ڈر، وحشت تہ خوف نا بسنیک نظر آنا
 ہے۔ پہلے اٹھ افسانے روایتی راہ ور ہی چلنے ہین، جنہاں پنج شکایت،
 مصایب تہ مشکلات جیہاں گلاں لہنیاں ہین تہ ہیئت نے اعتبار ناں
 ایہہ چوکھا سرمایہ پیش کر رے ہین۔ کسے نے آکھیا ہے۔

"Literature is the mirror of contemporary society"

اسے طرح ”غیرت“ پنج اس علاقے نے طبقاتی نظام نا چھاملہ
 لہنا ہے۔ اتھے اقبال نا ”یوں تو مرزا بھی ہو، سیّد بھی ہو، افغاں بھی
 ہو“ سیف الملوک نی پری تہ آدم زاد سیف الملوک، اسے طرح اتھے
 سیّد، بکروال، گجر، راجپوت تہ کشمیری نی گردان وی اس مزاج نی عکاس
 ہے جیہڑا اتھے رائج الوقت رہیا ہے۔

عام طور پر لمے چوڑے افسانیاں کی اس ”لفافہ“ آکھنے
ہاں، درحقیقت پنج آزاد ہوراں نا ”لفافہ“ ہی اوہ پہلا افسانہ ہے جس
کی افسانچہ آکھنے پنج کوئے باک بیہ۔ چار سطران نا افسانہ آرمی یا پولس
نا افسر سی۔ ور چوتھی سطر پنج ”توں کون تہ کتھوں آیا ہیں؟“ ایہہ آکھ
کے اوہ ذات، جماعت نی شناخت واسطے اک جتن سی۔ جیہڑا اساں
نے ماحول پنج خاصہ ڈوہنگا اثر کر چکلیا ہے۔

”لفافہ“ نواں افسانہ ہے تہ اس توں اگے اخیر توڑی افسانیاں
نا علامتی رنگ ہی اپنایا گیا ہے تہ ایہہ آزاد صاحب نی مجبوری وی سی
افسانچے کس طرح اپنا انجام پیش کرن۔ اک افسانہ ”فرق“ اج نے
سماں پنج سرمایہ دار نی حد لذتیت تہ غربت نی ماری دوشیزہ نی مجبوری نا
حوالہ پیش کرنے نی کامیاب کوشش کییتی گئی ہے جیہڑی اج عربی شیخان
نی نفس پرستی تہ ذلالت نی دلیل ہے۔ آزاد ہوراں نی زبان نی نکسال
اس توں چنگی کہہ ہوسی کہ اک غریب مُنڈا پہلاں مندر، بے رُعبا،
پولاں لان آلا تہ برادری پنج ٹھکر ایانا ہونا ہے تہ بقول بابو جگجیون

رام (سابق مرکزی وزیر) ”روٹی اور بیٹی برادری میں نہیں
برابری میں ہوتی ہے“ جدوں اوہ اسٹنٹ فوڈ سپلائر افسر بن جانا
اے تہ اوہ فر نہ تہ مندراتہ بے رُعبا لکھنا ہے، نہ ہی پولاس لان آلا، تہ
سیٹھ ہور نکاح ناسادا اس نے کہڑ بہلے بہلے پہنچنے ہین۔ اک کامیاب
تہ دیانت دارانہ کوشش ہے۔

آزاد صاحب فی طبیعت بچ ظرافت نا عنصر ہمیشہ غالب رہیا،
تہ اوہی مزاج ”کرتوت“ بچ اپنایا گیا ہے۔ جس کی پڑھ کے بسو نگریا
ہو یا وی ہسنے توں میہ رہ سکں لگا۔ اس بچ ادا نیگی کس طرح ہوئی ”جنے
نے کرتوت چنگے میہ۔ تگونا زمانے نال بدلنا پینا ہے۔ نہ ڈانس فی محفل،
نہ کوئی ہور انٹرٹینمنٹ، کہانی نا داند بنی جینا وی کوئے زندگی ہے؟“
اُس دند بٹکی آکھیا۔ ”عادت“ اک ہور کامیاب افسانہ جیہڑا اج نے
نوجواناں نے طور طریقیاں نا پوسٹ مارٹم ہے۔ ایہہ اصلاحی افسانہ
اج نے لوکاں نے مزاج کی بدلن واسطے ضروری ہے۔

اک ہور ملی ٹینسی نے پوٹرے بچ پہنچلیٹیا ہو یا کامیاب افسانہ

”باڑھ نگلی گئی“ جس بچ فوٹو پاس کی خلیتی بچوں کڈھان

آلے نارول ملنا ہے۔ ایہہ علامت نے سہارے نال داستان بیان
کرن آلا افسانہ ہے جیہڑا پچھلے دور بچ ہر کہڑ نارولاتہ ہر بستی ناسیا پا
رہیا ہے۔ افسانے نا خاتمہ بڑی خوبصورتی نال کیتا، ملاحظہ کرو اجاں
اوہ گجھ ہو آکھنے ہی آلا ساتھ فر پتہ نیہہ کتیاں اُس کی اپنی ہی باڑھ
نگلی گئی۔“ ایہہ باڑھ کہہ سی؟ کس نے لائی سی؟ اس نا پتہ ہونیاں وی
اس کی زبان نیہہ دتی جانی۔ ایہہ اس دور نا المیہ ہے تہ انہاں بستیاں
نے اس طرح نے متے سارے ڈرامے تکے اسے قبیل ناک ہور
افسانہ ”مرنے دوغڈا رتھا“ کون کہہ سی؟ کتیاں سی؟ کدوں سی؟ ایہہ
اک سوال ہے جس نے جواب واسطے کوئے منہہ نہ کھلسی۔ آزاد
ہوراں گجھ ہو افسانے وی: contemporary treatment انداز بچ لکھنے
ناجُرات مندانہ کم پڑا کیتا، تہ مستقبل بچ پہاڑی زبان نے حوالے
نال لکھاریاں کی اک راہ، اک سِلک تہ اک مزاج دتا۔ گویا کہ اس
روش بچ ایہہ اک میل نا پتھر ہے جس کی دیکھ کے لکھاری اپنی

اپنی بساط کی ناپنے رہسن تہ انہاں نیاں قائم کیتیاں سرحد اں
تک چلنے نا جتن کرسن۔ آخر بچ آزاد ہو راں فی نذر.....!

ہو ا بچ ویا بالی جاساں

چھٹکھو کی میں ٹالی جاساں

دل نے کو لے تیری خاطر

ٹاپو اک میں تالی جاساں

نثار راہی (راجوری)



آزاد صاحب کا افسانوی مجموعہ ”درد“

..... ایک نظر (حاجی نذیر قریشی گورساہی۔)



آزاد صاحب کا افسانوی مجموعہ موسوم ”درد“ سماج کی دکھتی
 رگوں کی جراحی ہے۔ سماج کی نبض شناسی ہے۔ نئے نئے حادثات کا
 تحریری عکس ہے۔ سماجی برائیاں، معاشی ناہمواری، غیر مساوی سلوک،
 بھید بھاؤ، نسبی اونچ نیچ، تعصبات اور طبقاتی عینک کے موٹے شیشوں کی
 نشاندہی نہایت دلنشین پیرائے میں کی گئی ہے۔ زبان خالصتاً پہاڑی،
 لب و لہجہ پہاڑی اور صوتی آہنگ کلیاتاً پہاڑی۔ آزاد کے افسانے
 زیادہ ٹھنگ ہیں اور اپنا اثر چھوڑتے ہیں۔ اگر فراغ میسر رہے اور اگر
 کسب معاش کسب قلم کی اجازت دے تو آزاد صاحب پہاڑی ادب

کے کرشن چندر اور مہیندر ناتھ یا سعادت حسن منٹو سے آنکھیں
ملانے کی صلاحیت رکھتے ہیں۔ ”باڑھ نگلی گئی“ ”مرنے دو غدار
تھا“ ”بڑے لوک“ ”نتھ“ کہن چکری“ اور دوسرے افسانے پڑھ کر
قاری کے ذہن میں سنسنی، جھنجھاہٹ اور ہیجان پیدا ہوتا ہے۔ یہ تخلیق
کار کا کمال ہے۔

حاجی نذیر قریشی

گورساہی مہینڈر (پونچھ)



گلوں گل



شیخ آزاد احمد آزاد سورن کوٹ فی مردم خیز
تہرتی فی اوہ باوقار شخصیت ہے جس زندگی نے ہر پہلو فی کھیڈ بڑے
ماہرانا انداز بچ کھیڈی تہ کدے کلین بولڈ نہ ہوئے۔ انہاں فی کامیابی
نا راز انہاں محرومیاں بچ پوشیدہ ہے جہاں ناسامنا انہاں کی اپنی
زندگی نے ابتدائی دور بچ رہیا۔

آزاد جتھے اک خوبصورت شاعر ہین اُتھے ای قدرت نے
انہاں کی نثر نگاری فی خوبصورتی نال وی نوازیہ ہے تہ اس فی مثال
انہاں نازیر نظر مجموعہ ”درد“ ہے۔

”درد“ اک نہایت ہی معنی خیز عنوان ہے جیہڑا ماہرے خیال
بچ بڑی سوچ بچار تھیں بعد تجویز کیتا گیا ہے۔ اس سارے

مجموعے کی درحقیقت اساس ای ”درد“ اُپر رکھی ہے تہ ایہہ درد ای ہے جس تھیں آزادنیاں کہانیاں ناخمیر اُٹھیا ہے۔

”درد“ بچ شامل کہانیاں نا اصلی لطف حاصل کرنے واسطے قاری کی اُس پچھو کڑ بچ اوکڑی تہ تنکا پیسی گا جتھوں آزاد ہوراں انہاں کہانیاں فی مٹی حاصل کری اُس کی ساہدی گھنٹی تہ اپنیاں کہانیاں نیاں خوبصورت مورتیاں تراشیاں۔

آزاد ہوراں جس ماحول بچ اکھ کھولی اوہ پسماندگی تہ در ماندگی نا دور سی۔ پورا معاشرہ غریبی، تنگدستی، بے بسی تہ لاچارگی فی ڈاہڈی پھامی بچ پھسیا ہو یا سی۔ اُس دور بچ غربت فی چڑیل ہر ویلے تہ ہر پاسے عام آدمی کی اپنے بے رعبے دند بشلٹی تہ خوف زدہ کرنی سی۔ ٹانویں ٹانویں اوہ لوک وی سن جہاں نے سراں ور وقت نا غرور ہونے نا نشہ سوار رہنا سی۔ جیہڑے لوک اپنے آپ فی سیان ساہوکار، نمبردار تہ ذیلدار جے القاباں نال کرانے سن۔ اُس دور بچ ایہہ ”دار“ نا لاحقہ ظلم تہ جبر فی علامت بنی چکلیا سی۔

ایہہ دور بڑی حد تک آپ راجی نا دور سی تہ متذکرہ بالا
 ”دار“ اپنے قائم کیتیاں ہوئیاں انہاں خدا نیاں نے سفید تہ سیاہ نے
 مالک سن تہ اپنے اس بے بیاد اقتدار نے نشہ بچ اوہ لستے ماڑے عوام
 کی ویلے کویلے ڈتے دینے تہ اپنی خدائی نے احساس کی تسکین دوانے
 ہین۔ مگر حالات نے وچو داہر صدیاں تھیں جی بے بسی نی اس کالی برف
 کی گلنیاں کجھ زیادہ چر نہ لگاتہ ہولیاں ہولیاں اقتدار نپاں انہاں
 کچیاں بٹاں نی مٹی کی نویں زمانے نی کھوہری بارش سن کجھ اسراں
 کھور لائی جے اوہ پتہ نیمہ کیمڑے ویلے گلی تہ پانی نال پانی ہوئی گمنامی
 نے سمندراں نی تہہ بچ دفن ہوئی گئے تہ فیروقت نے ایہہ نمرؤ دنویں
 زمانے نی دروٹی اہر ننگ متنگے، لاچار تہ مجبور کھل نظر آن لگے۔

آزاد ہوراں نیاں کہانیاں نی شروعات ہی اُس دور بچ ہوئی
 جدوں آپ راجی نیاں بٹاں کی نویں دور نیاں بارشاں کھور لائی چکیاں
 سن تہ بے بسی نیاں گلکھ ہنیریاں راتاں بچ آساں نی لو نا تارا
 چڑھی آیا تہ اُس بانگ دتی جے اُمید نادہ نیمہ ایہہ چڑھیا کہ ایہہ

چڑھیا۔

نویں دورنی روشنی بچ نویاں روایتاں قائم ہوئیاں تہ ہڈکیاں
تہ ہاڑیاں نیاں دہشت ناک ناگناں کی جدید تعلیم نے منتران کپلیاں
شروع کر رکھد ا۔ جتھے کل بے بسی تہ بے کسی نے جال تنے ہوئے سن
اُتھے اُج خوشحالی ڈیرے لا رہی ہے۔ جہاں چھنگیاں اُپر جہالت
نیاں گلکھ کالیاں راتاں ڈونگی بوکی ماری ہوئی سی اُتھے ہن علم تہ فہم
و فراست نے چراغ روشن ہوئی چلے ہیں۔

شیخ آزاد ہوراں نیاں ایہہ کہانیاں پہاڑی ثقافت نی تاریخ نا
اک ابھیا منظر نامہ ہے جس بچ ماضی تہ حال نیاں کڑیاں کی بڑی خوب
صورتی نال جوڑیا گیا ہے۔ انہاں کہانیاں بچوں اکثر کہانیاں اوہ ہیں
جہاں بچ المیہ پہلوواں نا جمال لشکارے مارنا دہسنا ہے۔ آزاد ہوراں
زندگی نے باقی سارے رنگاں کی وی کہانیاں نی پھلکاری بچ بڑی
مہارت نال برتیا ہے۔ ایہہ دؤئی گل اے جے پہاڑی ثقافت نے ان
مٹ نقوش پیش کرنے والیاں انہاں کہانیاں بچ کدے

کدے قتی کمزوریاں وی چہا تھی مارنیاں نظری اچھنیاں پر کُل
ملائی ایہہ مجموعہ ہر حال اپنی اہمیت نا حامل ہے۔ جس کی قارئین خوش
آمدید آکھسن گے۔

دُعا ہے جے آزاد ہوراں نا قلم ہو رکامیا بی نال نویں
نویں معرکے سر کر نار ہو دے آمین۔

جموں ۱۰ جنوری ۲۰۱۲ء

ڈاکٹر مرزا فاروق انوار



سانجھے ”درد“ دی عکاسی آزاد دی قلموں



لکھاری پہانویں کسے وی بولی دا ہووے یا کسے وی علاقے
نال اُسدا تعلق ہووے اوہ بے حد حسّاس ذہن داما لک ہوندا ہے۔
اُسدی ایہو بے خُوبی اُس کو اپنے دُویاں ہم عصر ایں سنگیاں بلکہ کہنرا
دیاں ٹبر ایں کولوں الگ کر کا سماج بچ پک وکھرے باعزت مقام اُپر
فائز کردی ہے۔

شاعر مشرق دا ایہہ شعر اس حقیقت کو آشکار کرن واسطے کافی ہے کہ:

بھول کی پتی سے کٹ سکتا ہے ہیرے کا جگر

مرد ناداں پر کلامِ نرم و نازک بے اثر

قلمکار داجگر یقیناً ہم پرے دا ہوندا اے پھلا دے معمولی نرم پترا
نال بھی کپتا جاسکدا ہے۔ اسے واسطے جد قلمکار شاعر یا ادیب کوئی نئی
جی گل بھی دکھدا اے اوہ اس تھیں اثر قبول کر لیندا اے۔ جد کہ سخت
دل تہ عام نادان قسماں دے انساناں دے سامنے غیر معمولی واقعات
بھی رونما ہوندے ہین مگر انہاں پر رتی پھر کوئی اثر میہ ہوندا۔

شیخ آزاد صاحب اپنے سپنے بچ ہک مُج نرم و نازک تہ حسّاس
دل کہن کا پیدا ہوئے دے ہین۔ اوہ جس سماج دی ہک اکائی دی
حقیقت بچ جی رے ہین۔ اس سماج سن انہاں کو بہت کجھ دتا ہے جس
بچ ہک چیز ایہہ ”درد“ اے۔ جیہڑا اندے افسانوی مجموعے دا عنوان
بن گیا۔ اسے درد سن انہاں کو ”انساناں“ دے دمرے بچ آن کھلا کیتا
اے۔

آزاد دے زیر بحث پہاڑی افسانوی مجموعے بچ کل ملا کے
(۶۹) کہانیاں شامل ہین جہاں بچ (۶۲) مٹی افسانے (افسانچے)
قاری دی توجہ دامرکز بن سکدے ہین۔ انہاں بچ کجھ روایتی

کہانیاں ہیں تہ گجھ جدید علامتی افسانے۔

شیخ صاحب صرف افسانہ نگار ہی نیہہ اوہ ہک منجھے دے شاعر بھی
ہیں۔ اُنندیاں ہک درجن کتاباں گجھ تاجھپ کا منظر عام پر آ گیا دیاں
ہیں تہ گجھ چھپن دے انتظار پنج کھلیاں اڈیکوان ہیں۔ اُنندیاں نثری
تخلیقاتاں دی خوبی ایہہ ہے کہ اُنہاں کو اگر نثری شاعری آکھیا جُلے تہ
بے جا نہ ہوسی۔ خصوصاً ”درد“ دے حوالے نال میں دعویٰ ثابت کر
سکساں کہ اُنندیاں افسانیاں پنج وی شاعری پھری دی اے۔ خوب
صورت تہ سوہنے الفاظ، استعارے تہ حسین اچھوڑتے خیالات سماج
دے اندر کھنڈے دیاں دُکھاں درداں دی منظر کشی مُج سوہنیاں لفظاں
پنج کیتی اے۔ دیہاتی ماحول، مقامی کردار تہ روز مرہ ہون والے
واقعات اُنندیاں افسانیاں دی خصوصیت اے۔ اُنندے آس پاس
کھیتاں کھلیاناں، نکیاں تہ ماہلیاں، کوٹھیاں تہ حویلیاں، بزاراں تہ
ویرانیاں کھساتے گندگی دیاں ٹھیراں اُپر تہ باہر پے دیاں کہانیاں دے
پلاٹاں کو اُنہاں بٹیل کا اپنے قلم نال گجھ اسطرح ترتیب دتا اے

کہ انہاں کہانیاں دارو پ اختیار کیتا اے۔ انہاں دی کسے
 بھی کہانی دی سچویشن (منظر) غیر مقامی نیہہ تہ جانے سنجانے، اپنے،
 گرائیں، نمبردار، ماسٹر، پٹواری، منشی، راکھے، دکاندار، کوڈی، جھی تہ
 گلی ڈندا کھیڈن والے گدرے، باڑیاں تہ کھیتیاں بچ کم کرن آلیاں
 سِدھیاں سادیاں کال سِریاں، ظالم تہ مظلوم، حاکم تہ محکوم، مزدور تہ
 ٹھیکیدار، گائیاں، داند، گتے کتیاں، بکریاں تہ پھینڈاں، کہوڑے تہ
 کھوتے، تتیاں تہنپاں تہ سیالے دی کالیاں جان لیوا راتاں، بہارا
 دیاں رُتاں تہ گوڈی تہ تالی کردے دہنی گبرو، لیتری تہ بیاہ بچ ٹھہولیاں
 دیاں لکڑاں تہ ٹھہوواں، رونا تہ ہسنا، غرض زندگی ہر سطر بچ رواں دواں
 ہے۔

انہاں افسانیاں کو پڑھ کاٹکو کرشن چندر دی ”ٹھکست“ تہ ”میری یادوں
 کے چنار“ ناواں دے کردار سائیں، تارا، دُلا، نور، تائی ایسری، شمس
 الدین تہ امر ناتھ یاد آندے ہین۔ نائب تحصیلدار تہ پٹواری، سپاہی تہ
 لالی، مولوی تہ پیر صاحب تہ کھڑ بچ نالے بابا تہ رشوت خور افسر

پنڈت تہ بنیا۔

آزاد صاحب دیاں کہانیاں دے موضوعات انہی جیہاں کرداراں
دے آس پاس تھیں پختے کئے دے ہین۔ انسانیت، ہمدردی، انصاف
، روستی ہندو مسلم بھائی چارہ، رواداری تہ میل جول ایہہ آزاد دیاں
کہانیاں دی "THEME" رہی ہے۔

اُندیاں افسانیاں بچوں "ہمت" "وعدہ" تہ "عملاں دی مار"
چھڑے دیہاتی سماج دی عکاسی کردے ہین۔ اندے مکالمے ولا
دے اندر لہیہ گیندے ہین۔

افسانچہ یا مٹی کہانی لکھنا ہرگز سہل کم نیہہ۔ مگر آزاد سن بڑی
خوبی نال اس فن نال بھی پورا انصاف کہتیا ہے۔ انہاں بچ "خصلت"
"مسکریٹ"، "گجھ تہ لحاظ کر"، "سچ فی سزا" تہ "تہذیب نا جنازہ"
شاہکار تخلیقاں ہین۔

مجموعی طور پر "درد" پہاڑی افسانوی ادب بچ ہک گرانقدر
اضافہ ای نیہہ بلکہ ایہہ استا ہک انمول سرمایہ بھی ہے۔

ع: اللہ کرے زورِ قلم اور زیادہ۔

میں شیخ آزاد کی اس عظیم کارنامے واسطے مبارکباد دیندا ہاں۔

احقر

راجہ نذر بونیاری

بونیار (بارہمولہ)

کشمیر



روایتی افسانے



ہامت



اسلم پنجی جماعت نے سالانہ امتحان بچوں پورے سینٹر نے
مُنڈے گڑیاں تھیں زیادہ نمبر حاصل کر کے ایہہ ثابت کر دیتا ہے علم
کسے فی میراث نیہ۔

گراں نے کجھ لوکاں کی ایہہ گل چنگی لگی وے یا مندی ور
نمبردار ہوراں نی چھاتی ور منگ ضرور دن ہوئی، تہ اُنہاں پہائی کے کی
اپنے کہنر بلایا کجھ درگل بات کیتی۔ کماں نمبردار ہوراں فی نیت تھیں
پہلاں ہی واقف سا۔ ہاں بچ ہاں ملانا رہیا تہ دیگر ویلے کہنر مڑیا۔
پہاپا نمبردار ہوراں کیاں بلایا ساٹساں کی؟“ اسلم سن بلیں جے اپنے
پہاپے کی کچھیا۔ ”ایویں بچہ..... اوہ کہ آکھنیں جے پہائی
بلیئے تہ بگے نا کجھ چنگڑا سا چنگڑا اوہ دڑوئی آلی بلی ہے نا.....

بیلی..... کہ آکھنیں جے پہائی صمدے نی زمی نال جس نا
 بٹہ جُویا نا ہے بس اُسے بیلی نے بٹے وروں روز روز کہنول ہونا رہنا
 سا، کہنول وی کوے کنالاں نانیہ سابس پنجاں مرلیاں وروں گھنکنے
 سن۔ اُسے واسطے کجھ گل کرنی سی۔ کماں کجھ ہو آکھنے آکھنے نہ آکھی
 سکیا۔

”پہا پا اچ وی سوہنیاں سوہنیاں گلاں دہسو پہنکے سکول جیہڑا چنگیاں
 گلاں دہسن بچ فست آسی اُس کی ماشٹر ہوراں آکھیا ہے جے انعام
 لہسی۔ نالے پہا پا جی اک گل تہ مکی ہُن یاد آئی ہے، ماشٹر ہوراں
 تِساں کی وی سکول بلایا ہے سکول، اسلم خوشی خوشی سوہنیاں گلاں سُنن
 نی تیاری بچ سچا ہتھ ٹھڈی ور رکھ کے پہا پے نیاں اکھیاں بچ اکھیاں
 بابیاں۔

”بچہ دُعا کر دُعا جے میں اپنی زندگی بچ مکی پڑھائی لکھائی اک
 بڑا آدمی بنیاں تاگاں۔ جس دن تو غریب، مظلوم تہ بیکس نی مدد کر سکیں۔
 حق تہ باطل کی پہچان سکیں۔ اچ بس اس تھوں زیادہ آکھنے نی

کچھ ہمت نہ تہ نہ ہی کوئے پرانی گل یاد ہے۔ جاج اپنا
سبق یاد کر سبق“

”پہا پاج کل بڑا تہ اوہ ہے۔ تگونا نمبردار ہور گراں نے لوکاں
کولوں اپنے سارے کم کاج کرانے ہین۔ کوئے مجبوری نال نہ جائی
سکے تہ اُس نی کسراں شامت آنی ہے اِس نا اندازہ اِس گل تھیں لایا جا
سکنا ہے جے چا چا کرماں پرسوں فضل نے کہڑ ہوئی چوری وریج نہ
آکھنا تہ اُس نی مدد نہ کرنا تہ اِس نا کوٹھانہ سڑنا، اُس کی تھانیدار ہور
بلائی نہ ڈرانے تہ نہ ہی اوہ اپنے آپ کی لگا سمجھنا۔“ اِسلم اپنے پہا پے
کی بڑے تہ نکلے لوکاں نیاں مثالیں دینا رہیا ورا اُس کی کہہ پتہ جے
اُس نا پہا پیا انہاں گلاں تھیں مُنڈھوؤں واقف سا۔ تہ ایہہ ساریاں
سقاں چھٹلی پلینا سا۔

”نہیہ پتر نہیہ، ایہہ گل نہیہ، ٹکی کہہ پتہ جے تو اہڑی ماں
ہشتن نے مرنے آ لے تہیناڑے میں کہہ کہہ وعدے اپنے اللہ نال
کیتے سن۔ انہاں بچوں اک وعدہ ایہہ وی سا جے اِسلم بچے کی

پڑھا ساں اتنا پڑھا ساں جے اوہ چنگے مندے نی پچھان کری
 سکے۔ چنگیاں نی خدمت کرے تہ مندیاں کی چنگیاں بنان نے جتن
 کرے۔ مجبور، مظلوم، بے کس تہ بے بس لوکاں نے کم آئی سکے۔ اس
 واسطے تُو پڑھ، اتنا پڑھ، اتنا جے تکی اپنے آپ پتہ لگنا رہوے جے اس
 دُنیا بچ اس اہڑے آنے نا مطلب کہہ ہے۔؟“

جھیمی جماعت نا نتیجہ نکلیاں بس پندراں دن ہی ہوئے سن،
 اسلم فرسٹ آیا تہ اُس نے پہاڑے کی کچھ ہور اُمید ہوئی جے اوہ دن
 دُور نیہ جدوں انشاء اللہ اُس نا اسلم اک بڑا آدمی بنسی تہ اُس نے
 سارے ارمان پُورے ہوسن۔ اج ایویں وی بیسا کھی نا تہیا ٹا
 سا، لوکاں اپنے اپنے بیڑے صاف کری کے سویرے سویرے تہو اں
 کیتا نا سا۔ اسلم نے پہاڑے تہو اں تے نہ کیتا ورا اُس نے سینے اندر کئی
 ہور تہو یں بلنے تہ بچھنے رہے۔

گراں نے ادھ تھوں زیادہ لوک ٹھوکاں چلے گئے سن بس
 بڑے بڑے لوک گراں بچ آباد سن، تہ اپنے اپنے کماں بچ

مصرُوف سن۔ اسلم دھینی بالی تہ انگریزی نی کتاب پڑھن بچ
 مصرُوف سا۔ اچانک اُس نے پہاڑے کی غشی آئی، کلمہ شہادت پڑھیا
 تہ اسلم کی کہنل مکہلا چھوڑی سارے ارمان سینے بچ دبے دبائے اللہ
 کی پیارا ہوئی گیا۔ اسلم نکاتے مجبور ور ہمت نہ ہاری۔ جیہڑی دھینی
 بچی نی سی اس نامٹھا بنایا۔

ساون نی ملکھ کالی رات، نکا نکا بدل تہ اُپر وں تھند، نکا
 ہون نا خوف تے بڑا بنن نی اُمنگ اک دُوئے نال اسراں کھیڈ نے
 رے بے اسلم سن گراں نے نکلے تہ موٹے لوکاں کی رات ورات
 اپنے پہاڑے نی اچانک موت نی خبر سنائی۔

”اسلم..... بس دو بچھیاں، چار
 منجھیاں، اٹھ پھیڈاں، ترے گائیاں تہ بیہ لکڑو۔ لکڑواں نا کہہ آ آ
 کیتا تہ لکڑو مڑے بچ روکے۔ بچھے، منجھیاں، پھیڈاں تہ گائیاں بس
 کھولنیاں تہ کہاہ ہٹھا کرنا تہ بھدیاں، باقی آرام ہی آرام ہے۔ کہڑو
 کتاں تو اہڑا پو لکھی پڑھی تہ حج بنیا تہ ہن تو رہی گیا ہیں۔ چنگے

تھیں چنگلاتہ سوہنے تھیں سوہنا کھا۔“ نمبردار ہوراں ہمدردی

نا اظہار کیتا۔

”نیمہ نمبردار جی نیمہ..... میں انشاء اللہ بڑا آدمی

بنساں، میں تہ پہاڑی بہشتی نال وعدہ کیتا نا ہے جے اک تہناڑے

انہاں نے سارے ارمان پورے کر ساں۔ جابر تہ مجبور، ظالم تہ مظلوم،

غریب تہ امیر نالے نکلے تہ موٹے نی تمیز کر ساں تہ ہمیشہ مظلوم، مجبور

تہ نکلے نی مدد کر ساں۔ تئس وی نمبردار جی اپنی صفیہ رانی کی خوب

پڑھاؤ اوہ محنت نیمہ کرنی تائیں اوہ پنجمی پاس کری وی الف بے نی پٹی

نیمہ پڑھی سکئی۔ میں تہ پہاڑی بہشتی نال وعدہ کیتا نا ہے جیہڑا انشاء اللہ

پورا کرن نے جتن کرنا رہساں۔ اللہ مددگار ہے اوہ پاک ذات ماہڑی

مدد کرسی۔ نمبردار جی گراں نے ہور لوک تہ سادے ہین اوہ ماہڑی گل

نیمہ سمجھی سکئے۔ تئس ماہڑی مدد کری سکئے ہو۔ لالے رویل چند ہوراں

کولوں پہاڑی ہوراں نی گروی دتی نی ڈوگی چھڑائی دیو میں اللہ پاک

نال وعدہ کرناہاں جے لالے ہوراں نی رقم سو دسمیت ساریاں

نے قرضے مکان تھیں پہلاں دیساں، ”اسلم اگے ہو رگجھ نہ
آکھی سکيا۔

بڑا آدمی پہلاں مکاساں ایہہ
گلاں نمبردار ہوراں واسطے تیراں تھیں کہٹ نہیہ سن انہاں کی تہ
پہلاں ہی پتہ ساد جس دن پنجی جماعت نا نتیجہ نکلیا ساتھ انہاں اسلم
نے پہاڑے کی کہڑ بٹائی گجھ گلاں کیتیاں سن جہاں گلاں نا اظہار اسلم نا
پہاڑا اُس اگے نہ کری سکيا ساتھ استے واسطے اُس دن اسلم کی سوہنیاں
سوہنیاں گلاں وی نہ دہسی سکيا سا۔

”اسلم تونگا ہیں، اپنی زندگی تباہ نہ کر، سب گلاں
سدھیاں ہوسن ور بڑا آدمی بننے واسطے محنت تہ پیسے نی لوڑ ہونی
ہے، محنت کر تہ روزی کھا، رہے پیسے تہ اک ڈوگی سی جیہڑی لالے
رویل چند کو لے گروی ہے، اُس نی مرضی موڑے یا نہ، بس استے بچ
تواہڑی پہلائی ہے جے مزدوری کر مزدوری۔“ نمبردار
ہوراں لہر کیتی تہ بیٹھک نے بڑے دروازے بچوں اندر ہوئی

گئے جتھے اسلم نا پہا پا زِ ندگی پوری نہ جاسکیا تہ اسلم فی کہہ مجال
.....؟ اسلم تہ اجاں بچہ سا اُس فی کہہ جرات ہو سکنی سی۔؟



ٹھیک تیراں سال بعد اسلم ہر فیصلہ کرن تھیں پہلاں کیس فی
نوعیت، دائر ہون فی تاریخ، کیوں تہ کسراں ہر لفظ نا ڈو ہنگی نظر ناں
مطالعہ کرنا سا۔ اُس کی اپنے پہا پے نا پیار، اُس فی خواہش تہ لوکاں فی
مظلومیت سچ تہ چھوٹھ سب مدِ نظر سن۔ اُس نے چارج سہال ن تھیں
پہلاں ہی تقریباً چار سو دو کیس عدالت بچ فیصلے نے اڈیکوان سن،
جہاں نے فیصلے کرن واسطے اسلم کی کتنی محنت کرنی پئی ایہہ اُسے کی پتہ
ہے۔ اسلم اج انصاف فی گُرسی ور لوکاں فی خدمت بچ لگا نا ہے
کوئے نمبر دار، کھڑ بچ تہ موٹا منجھیاں پتھے تہ ڈنگر چار نے واسطے میہہ
آکھنا تہ نہ آکھی سکسی۔ اسلم نے پہا پے فی روح تہ اج خوش ہوئی ہو سی
ور اسلم فی محنت تہ ہمت تہ تلو اُس فی محنت تہ ہمت -



وعدہ



سارے گرائیں حیران سن بے اٹھ سال پہلاں اوہ اپنی بڑھی
 مائتہ اک پہر کی چھوڑی پتہ نیہہ کیہڑے پاسے ٹری گیا سا.....؟
 اُس سن کہہ رکتیاں چھوڑیا؟ ایہہ اک اجیہا سوال سا جس نا جواب
 سارے گرائیں جانا چاہنے سن۔ نمبردار ہوراں کی چنگی طراں پتہ سا،
 وراوہ کسے کی اس بارے پنج دہسنا نیہہ چاہنے سن۔ اوہ تہ ہر گل تہ راز
 تھیں واقف سن۔

اُس فی سمہال تھیں پہلاں ہی اُس نا پہا پا ہمیشاں واسطے
 انگھیاں پیچی دُور بہوں دُور چلا گیا سا جتھوں اج توڑی کوئے وی گیا
 نا، نہ مڑیا تے نہ مڑی۔ دو ڈو گیاں تہ اک چھنگی اُس کی وراشت پنج
 لہی سی، جس بچوں اک ڈوگی تہ لالے کرم چند ہوراں اُس فی سمہال
 تھیں پہلاں ہی پہا پے بہشتی نے مرنے ور کفن دفن تہ باقی نکلے

موٹے خرچے نے بدلے گروی رکھی نی سی، دُوئی ڈوگی بس
 پنج مرلے ریہی گئی سی جس نے ترے پاسے موٹے موٹے گماہنڈیاں
 کھنی کھنی ستاں مرلیاں توڑی پُچائی نی سی بس اک پاسا بچیا ناسا جتھے
 اُس نے پہا پے نے ویلے نی چھنگی اجاں تھم شم لائی کھلائی نی سی۔

حمید کی نمبردار ہوراں نال سلیم نی نوکری پسند نیہہ سی اوہ اپنی
 اماں کی کدے کدے سلیم واسطے پچھنا رہنا سا۔ ور اُس نی اماں نے
 ایہہ گل پردے اندر رکھی نی سی۔ اک دن اُس نی اماں نے خورے
 کتیاں حمید کی اپنے کول بلایا تہ کجھ آکھنے آکھنے وی نہ آکھی سکی۔ حمید
 جیہڑا اس گل کی جاننا چاہنا سا، اپنی اماں کی اپنی قسم دتی تہ سچ سچ گل
 دہسن ور مجبور کیتا۔ حمید نی اماں، اُس نی دتی قسم کی نہ ٹالی سکی تہ
 بولی "بچہ اک وقت اجیہا آیا جے اسا ہڑے کہڑے بچ کھانے واسطے
 کجھ نہ سا۔ ایہہ بہشتی ماندے سن۔ دوائی داروؤں واسطے پلے پھٹی کوڑی
 نہ سی۔ آخر اک دن آیا جے اوہ سخت لاغر ہوئی گئے۔ ساو دا نے واسطے
 دس روپے ضرورت سن۔ میں کہنلی تہ ٹس نلے بڑی سوچ کیتی

ور کوئے پاسا نظر نہ آیا۔ آخر انہاں کی غشی آئی تہ میں دوڑنی
 دوڑنی نمبردار ہوراں نے کہتر جانی انہاں اگے عرض کیتی، ”نمبردار جی
 ایہہ سخت ماندے ہین ہوئی سکے تے دس روپے اُدھارے دیو۔ ہور کچھ
 میہہ تے انہاں کی ساہ دانی نی پیالی بنائی دیاں“
 ”کوئے گل میہہ فاطمی، تَس کوئے دُورے نے ہو.....؟ یا
 تو اہڑے ور کوئے ابھے سائی ہے، بھائی حشمت ماہڑی بڑی نوکری کیتی
 نی اے۔ ہن دس روپیے تہ جا بھائی کے کی بنائی دے ساہ دانی نی
 پیالی۔“ میں اجیس دس روپیے ہتھے ور رکھی گوجے بچا با ہے وی میہہ
 سن، تہ جلدی جلدی کہتر مُڑنا چہنی ساں جے نمبردار ہوراں نے
 ہوٹھاں بچوں ایہہ لفظ نکلی تہ ماہڑے کتاں توڑی جُجے۔ ”فاطمی تکی تہ
 پتہ ہے جے بھائی کماں بیمار ہے، اُس ہاروں ہن ماہڑے کہترے نا
 خیال کیہنڈار کھسی.....؟ سلیم اپنے پترے کی نال آنی تہ کم کاج دہسی
 جایاں، ہور کچھ میہہ چوخر شوخر پھیریا کرسی۔“ سلیم زنگاتہ میں مجبور، اک
 پاسے ظالم تہ دُورے پاسے مظلوم، جابر تہ مجبور نکلے تہ موٹے

نالے ظالم تہ مظلوم نا کچر توڑی کہول سوبھنا سا.....؟ میں
 بڑی عاجزی نال عرض کیتی ”نمبردار جی اوہ..... اوہ..... اوہ..... تہ
 مساں پنجاب سالاں نا ہو یا ہے۔ اوہ ڈنگراں نال رہسی نمبردار جی
؟ پنجاب سالاں نامشوم.....؟ انصاف کرو انصاف
نمبردار جی انصاف.....؟

نمبردار ہوراں ماہڑی اک نہ مٹی اُلٹی لہر کیتی تہ میں اُسے دِن
 سلیم تو اہڑے پہر او کی، نمبردار ہوراں نے ڈنگر ڈکنے واسطے ہیچیا
 ، تو اہڑے پہا پے بہشتی نے مرنے آ لے روز سخت مجبور ساں تہ میں فر
 اک من تہائیں آندے تہ اُسے دِن سلیم فی نمبردار ہوراں نال دس سال
 فی زبان کیتی۔ اُسے واسطے اس سلیم کی نمبردار ہوراں نالوں نیہہ موڑی
 سکے۔ زبان تہ ایمان بڑی گل ہے۔ آخر اساں مرنے ہے۔ حمید فی اتماں
 فاطمی نیاں اکھیاں ساون فی چہرہ تھیں کہوٹ نیہہ سن لہنیاں تہ فر
 اک خاصے چھٹ اُس فی زبان وی بند رہی۔

”اتماں تہاں ایہہ گل پہلاں کتیاں نیہہ دسی.....؟“

حمید رونے آلا ہوئی گیا..... رونے آلا..... آخر انسان

سا..... انسان..... تہ انسان فی اولادوی۔

”بچہ ٹکی یاد ہو سی جے سلیم نے بدلے ٹکی نمبردار ہوراں نال
رہن واسطے آکھیا سا ورثو اجاں ماہڑے مونہیں بچوں گل وی نہ نکلیں
دتی سی جے پہلاں ہی مگڑی گیا سیں، ہور کھڑا سا جس کی پہچاں
.....؟ ذرا سوچ بچہ سوچ، ٹھنڈے دماغ نال سوچ“

”اماں..... اماں جی.....! میں وعدہ کرنا ہاں جے اس
تھیں بچھے سلیم کی موڑن فی گل کدے بیہہ کر ساں۔ ٹساہڑے ایمان
ورڈوں سب کچھ گھمنا یا، اس تھیں بعد ماہڑا اللہ پاک نال وعدہ ہے جے
اُس سن چاہیاتہ ماہڑی موہو دگی بچ ٹساں کی کوئے دکھ نہ تکنا پیسی،
اجاں جوان تہ ہوواں، پتہ بیہہ کدوں اوہ وقت آسی.....؟ کدوں اوہ
وقت.....؟“ حمید نیاں اکھیاں بچ اتھر واں نے بدل ناچہڑو ڈوہنگے
تھیں ڈوہنگیر اہون لگی پیناتہ اوہ ہور گجھ آکھنے آکھنے وی نہ آکھی سکیا۔
اج منگلار نے پچھلے پہر فی چہنمہستی کہڑی تہ اُپر وں

کڑکناں بدل، تہ لوک سارے ستے نے، گراں نے گتے
وی دڑکے نے، شاید پوہ مانہہ فی ٹھنڈ سن انہاں کی چکروٹیا نا
سا۔ حمید نگا تہ ارمان بڑے، دل بچ بڑا بنن نے خیال تہ زمانے نیاں
تہرٹیاں چہلن نا عزم، نیندر مٹکی نی، اسے واسطے اج اُس کہر جھوڑن نا
عہد کیتا تہ اوہ کیمہڑے پاسے گیا اس گل نا کسے کی وی پتہ نہ چلیا۔

گجھ تہہناڑے تہ فر مہینے تہ سال سلیم تہ اُس نی اتاں سن رونے
تہو نے کڈھے، اڈیک رگھی ورا نہاں کی اُس نا گجھ اتا پتہ نہ لگا۔ حمید
کدھرے دُور بہوں دُور چلا گیا سا، اُس نے دِلے ورسخت چوٹ لگی نی
سی۔

ایہہ محلہ گھنی کھن نی سوڑی جی گلی سی جس بچ حمید کھلا کسے
دُور ہنگی سوچ بچ دُبیانا سا۔ پُرانی جی پھوڑی آلا پیریں نگا تہ او پر اجیہا
مُنڈا تکی کسے چُکھیا ”توں کتھے رہنا ہیں تہ اتھے کہہ کرنا ہیں.....؟“

حمید اک نظر کرامت نیاں نظراں بچ ملان نی کوشش کیتی، گجھ
آکھنا چاہیا ورا آکھنے آکھنے نہ آکھی سکیا۔ کرامت جیہڑا جلدی

بچہ سا، دوہریاں اُس کی سختی نال بولیا ”دھسنا کتیاں نیہہ؟“ سچ
 سچ دھس، کتھوں آیا ہیں تہ اُتھے کہ کرنا ہیں.....؟“ اجاں حمید
 گجھ ہی گلاں دھیاں سن جے کرامت اُس کی اپنے نال دہنی اک جنگل
 نے مُنڈھا اپنے کھنر بچا۔

کرامت کی بس اتنی ہی عمر نامنڈا چاہی ناسا، اُس نے بچے
 پڑھنے سن تہ اوہ اک رحمہ دل قسم نازمیں دار سا۔ اُس نا تجربہ وی اُپے
 در جے ناسا، ہووے وی کتیاں نہ؟ اُس وی زمانے نیاں تہریاں چھلی
 چھلی تہیٹاڑے کڈھے نے سن۔ فر وی اُس حمید کی اک مہینے توڑی
 از مایا جس بچہ اوہ کھرا اُتریا۔ کرامت فی کئی تہیٹاڑیاں فی ڈوہنگی سوچ
 آخر اُس کی اس نتیجے در پہنچایا جے اوہ اُس کی وی اسے طراں پڑھاسی
 جسر اں اوہ اپنے بچیاں کی پڑھانا چاہنا ہے۔ اُس ایہہ پگا ارادہ کیتا
 جے اوہ ایہہ سب گجھ اپنے پروردگار فی رضا مندی واسطے ہی کرسی۔

اج حمید قاعدے لگاتہ اوہ بہوں خوش سا جے اوہ پڑھسی اتنا
 پڑھسی جے..... تہ اسے طراں پتہ نیہہ لگاتہ ترے

سال گزری گئے۔ انہاں ترے سالوں پنج ہی اوہ پنجمی پاس
کری تہ چھمی جماعت پنج داخل ہو یا۔ ہُن اوہ پہلاں کولوں سیاناوی ہو
ئی گیا ساتھ بہوں محنتی وی۔

دسویں جماعت نا اِج نتیجہ نکلن آلا سا، سارے اِس گل نی
انتظار پنج سن جے حمید نی محنت کہ رنگ لاسی نالے اوہ کرامت نی فوزیہ
کی وی پڑھانا ساتھ اُس نے کتنے نمبر آسن.....؟ کدے کدے
کرامت حمید نے سامنے تہ اُس نے چچھو کنڈھ اُس نی محنت تہ
ایمانداری نیاں گلاں کری اپنے پچیاں کی مثالاں دینا رہنا سانالے
اُنہاں کی ایہہ وی احساس کرانا اُس نام سا جے حمید اُنہاں نی نو کری
وی کیتی تہ اُنہاں کی پڑھایا لکھایا تہ آپوں وی پڑھی ہر جماعت پنج چنگے
نمبر آندے۔ اِج وی اوہ ایہی گلاں کرنا سا جے ریڈیو کشمیر سرینگر
ورؤں اعلان ہو یا ”یہ ریڈیو کشمیر سرینگر ہے، اب آپ دسویں جماعت
کے سالانہ امتحان ۱۹۶۶ء کا ریڈلٹ سُنئے۔ پہلی تین پوزیشنیں اِس
طرح ہیں۔ رول نمبر ۸۹۹۷۶۷ ہائی سکول گھنی کھن سرینگر

کشمیر حمید ولد شہمت نمبرات حاصل کردہ ۱۹۵۶/۱۰۰۰

مبارک ہو.....“ نتیجے نا اعلان ہونا رہیا تہ فوزیہ وی پاس ہوئی گئی۔ ”حمید ٹکی لکھ لکھ مبارک و راج تہ ٹکی دھسنا ہی پیسی جے تو اہڑا کہہ کر گتھے؟ تاں جے میں جائی ساریاں کی مبارک دیاں تہ ایہہ اعلان کراں جے علم بڑے لوکاں نی وراثت میہہ ہونی ایہہ تہ اللہ پاک نی عنایت ہونی ہے ورمخت تہ احساس اس کی رنگ و رنگ چاہڑنے ہین۔ مکی تو اہڑی پہلے تہیناڑے نی ملاقات زندگی پنج یاد رہوے یا نہ رہوے و راج نا تہیناڑا کدے نہ پھٹلسی۔ اج میں بہوں خوش ہاں حمید بچہ بہوں خوش، تہ ایہہ ثابت کردہ سیا جے عزم تہ اللہ پاک نی یاد زمانے پنج ہراوہ گل پوری کر دھسنے ہین جیہڑی لوکاں نے نزدیک مشکل ہی میہہ ناممکن ہونی اے۔ تہ آپوں وی پڑھیا تہ ماہڑے بچیاں کی پڑھایا تہ بچہ حمید ماہڑی فوزیہ جس نامکی پاس ہونے نا گمان وی نہ سا اوہ پہلی ڈویشن ہئی پاس ہووے ایہہ اللہ پاک نی مہربانی تہ حمید تو اہڑی سخت محنت نال پڑھان نا نتیجہ ہے، سخت محنت نا نتیجہ.....!“

کرامت نیاں اگھیاں خوشی نے اُتھر واں نال پہنریاں
نیاں سن تہ اوہ اج حمید کی اگھیوں اوہلے نہ ہون دینا چاہنا سا۔

”نیہہ چا چا جی، نیہہ نیہہ میں تہ محنت کیتی یا نہ ایہہ اُپر آلا ہی
جاننا ہے ور تساں نا احسان میں زندگی بچ کہ قبرے بچ وی نہ مکائی
سکساں، تساں جیئے مہر بان اس زمانے بچ تہاڑی مٹھا بالی لوڑنے ور
وی نیہہ لہمنے اگر میں اپنی چمڑی نیاں جتیاں بنائی تساہڑے قدماں لوائی
ساری عمر پالش کرنا رہواں فروی تساہڑیاں مہر بانیاں ناک پر سنگ
وی حق ادا نہ ہوسی۔“ حمید کی اج ہو رہوں ساریاں گلاں یاد پیاں تہ اوہ
رون آلا ہوئی گیا۔



حمید کی اج پہلی تنخواہ پورے پنج سو روپے لہھی سی تہ اوہ پہلا پہلا
جائی اپنی اتناں نیاں قدماں بچ ایہہ پیسے رکھنا چاہنا سا، اُس نے دلے
بچ ایہہ ارمان سا جے اُس فی اتناں اک دن اتنی خوش و ہے جے اوہ
دلوں منوں ہسے اتنی ہسے جے ساری عمرے نے غم منٹاں بچ

غائب ہوئی جان۔

چیتر مہینے نی کلکھ رات کالی تہ ٹھنڈ اتنی جے اللہ نی پناہ، فروی
اوہ رات اگھیاں بچ کڈھی تہ ٹکلی لوحمید اپنی اماں نے قدماں بچ پہلی
تنخواہ رکھن ٹری پیا۔ اوہ تہیناڑے سن جدوٰں پیدل سفر کرنا پینا ساتھ حمید
وی ترے تہیناڑیاں نا سفر کری وی رکیاں نہ تھکا ایہہ اُسے کولوں کچھیا
جائے تہ زیادہ چنگا ہوسی۔


اٹھ سال، پورے اٹھ سال بعد اج اُس کی اپنا گراں دہسیا
سا جس بچ بہوں ساریاں تبدیلیاں آئیاں نیاں سن۔ حمید نی نظر اپنی
چھنگی آلے پاسے پئی۔ اوہ جلدی کسہر پہنچنا چاہنا ساتھ اسے واسطے اوہ
پُرانے قبرستان آلے رستے دوڑنا دوڑنا قبرستان نے بشکاروٰں نکلیا ور
اُس کی ایہہ تکی سخت حرائی ہوئی جے ایہہ سیری سیری قبر جس
ور مارکین نی چادر اجاں تازہ مٹی نال پہری نی ہے، کس نی ہوئی سکنی
ہے؟ کس نی؟ اُس نے دل بچ ٹھستا جیہا پیا فروی اوہ اتنا خوش سا
جے اوہ اج اٹھ سال بعد اپنی اماں کی مِلسی تہ اُس نے

سارے ارمان پورے ہوں۔ اُس نے دل سن فر شک نی
سؤتیں اس گل در پھیری جے پہا پے نی قبر نال کس نی قبر ہوئی سکنی
ہے؟ وراُس نے دل بچ جیہڑا ٹھسٹا پٹیا سا اوہ کسہر بچن ور ہی دؤر ہو سکنا
سا، جدوں اوہ ساریاں گلاں لتاں کی چکھسی۔

”اے پاک پروردگار، اے ساریاں نے پالنہار، اے بزرگ
تہ برتر ہستی، اس ڈوگی بچ تہ اسا ہڑی چنگھی سی جیہڑی لوکاں نیاں
بڑیاں بڑیاں پکیاں عمارتاں تھیں سوہنی تہ اسا ہڑیاں نکیاں ہون نیاں
تہیناڑیاں نی پہائی وال سی۔ اتھے تہ دو منزلہ عمارت دہستی ہے۔ ایہہ
ماہڑیاں نظراں ناتھو کہ ہے یا کوئے ہو رگل.....؟ نہ لتاں نہ
سلیم چکھاں تہ چکھاں کس کی؟ ہے کوئے جیہڑا مکی تھمے؟“ فروی
حمید تھوڑا صبر کری تہ اپنے پُرانے گماہنڈی نصیر نے کسہر بچا اُس ایہہ
سوچ وی کیتی جے اُس نی لتاں ہمیشہ اُس نے کہڑوں آٹا ضرورت
ویلے ادھہار لینی رہنی سی، تہ اج وی ممکن ہے جے اوہ آٹا لین نصیر
چاچے نے کسہر آئی دہے۔

نصیر پہلاں تہ حمید کی پچھانیاں ہی نیہہ ور حمید اپنی
لماں فاطمی واسطے جدوں کچھیا تہ نصیر اُس کی اپنی چھاتی نال لائی سخت
رویہ تہ فر اُسے حالت بچ رونے تہ ہد کئے بولیا ”حمید، تو اہڑے جانے
تھیں بعد فاطمی اٹھ سال زندہ رہی۔ سلیم کی جو سری سکنا سا اوہ ماں کی
آنی دینا رہیا۔ تو اہڑے غم سن فاطمی کی تہیہاڑی راتیں اتھر واں نے ہار
پرونے ور ہی لائی رکھیا تہ اک تہیہاڑا اچھا آیا جے اوہ سخت ماندی ہوئی
گئی۔ کوئے ست مہینے نی بیماری تھیں بعد اسے سال ہاڑھ مہینے اوہ اللہ
کی پیاری ہوئی گئی۔ اِنْ لِلّٰہِ وَاِنْ عَلَیْہِ رَاجِعُوْنَ ۝ تو اہڑی نظر اُس
قبرے وروی پئی ہوسی جیہڑی تو اہڑے پہاڑے بہشتی نی قبرے نال تازہ
تازہ بنی نی اے۔ جس وراجاں مارکین نی چادر وی تھری تھرائی
اے، حمید کی نصیر سن ایہہ وی دھیا جے لالے کرچندے سورویٹے نے
بدلے نمبر دار ہوراں نال رلی اُس نی ڈوگی تہ چھنگی رکھی لیتی تہ کم شروع
کیتا، جتھے اج دو منزلہ عمارت ہے۔ ہُن تو اہڑا اس ورنہ ہی کوئے حق
رہیا تہ نہ توں انہاں ظالماں کولوں ایہہ موڑی سکنا ہیں۔“

حمید کی اچھیاں اچھیاں رونیاں سنی سلیم اپنے پہرہ اونی
 آواز کچھانٹوں نہ رہی سکیا تہ اوہ نمبردار ہوراں کی کچھن تھیں بغیر ہی
 اُس کول آئی چھاتی نال چمڑیا۔ حمید بسرونا تہ آخنا سا "اتماں..... اتماں
 میں وعدہ پڑا کرے تہ اج ٹیہر سارے پیسے تہاں نے قدماں بچ رکھن
 واسطے آندے سن، تہ ہُن اپنی پیاری اتماں کی کدے پھنکھا تہ نگانہ
 رہن دیاں ورتس تہ پہلاں ہی جلدی کرے ماہرے تہ سلیم پہرہ او کولوں
 دُور بہوں دُور چلے گئے ہو۔ دھتھوں نہ کوئے مڑیا تہ نہ مڑی۔



عملاں فی مار



اُوڑیا نا چٹی جیسی داڑھی آلا پہانی کا کا سوٹی پہار بلیں
 بلیں بڑے نکلے نے پر لے پاسوں چھواتا جیہا جانا دِھیاتہ اُس نے
 پچھے پچھے اُس نا اگو بچہ گلزار جس سن اپنی ماں کی دس دن پہلاں ای
 مٹی نے سپرد کیا سا، اس سوچ بچ دُٹا نا سا بے اج پہاپا اُس کی شہر
 دھسن نے شوق بچ اے۔ اوہ چھولیں چھولیں قد میں ٹرنا رہیاتہ دل ہی
 دل بچ گڈیاں نے تماشے تہ دکاناں تلکن نی خوشی، قسم قسم بیاں
 مٹھایناں نے خیال، نویں کپڑے لان فی خواہش تہ ہور بہوں ساریاں
 خیالاں بچ گم رہیا۔

”السلام علیکم بڑی سرکار“

”وعلیکم سلام۔ کا کا میں جموں گیا ناساں تہ تو اہڑی ٹبری نے مرنے ور نہ آئی سکیاں۔ مکی ایہہ پکا..... پکا یقین سا جے تُوں آپے تہ نیہہ ور نکے کی ضرور آنسیں۔“

”جی بڑی سرکار..... جی ایہہ ماہڑا بچہ گلزار اللہ نی

سپردتہ تہاں نے حوالے ہے۔ جس طراں تہاں ماہڑا ساری عمر خیال رکھیا، اسے طراں اس ناوی خیال رکھیو۔ اگو تہ بچہ ہے۔ پڑھانے نا خیال سا وراوہ وی پورا نہ ہوئی سکیا“ کا کے نیاں اکھیاں ڈبل ڈبل کرن لگ پیاں۔

”کا کا تنگی پتہ ہے جے پڑھائی خرچے منگنی ہے، ایویں تہ پڑھائیاں نیہہ ہونیاں، تہ بڑی گل تہ ایہہ اے جے پڑھائی بچوں لہنا وی کہ اے؟ ماہڑا بلو، چٹو تہ پٹو کیمڑے پڑھی تہ منسر بنسن گے؟“ شاہ ہوراں بڑی ہمدردی نا اظہار کیتا۔

”اچھا شاہ جی اللہ نے حوالے“ پہائی کا کے پچیاں اکھیاں

نے اتھروں بڑی مشکل نال روکے۔

گلزار پہانویں غریب سا، ورقد رت سن ذہانت دین پنج کوئے
 کمی نہ چھوڑی سی۔ ایہہ اُس نی عمر نابار ہواں سال سا جس چٹوں چھ
 سال اُس کی چھٹو شاہ نال ہوئے سن۔ اس بلی عمرے پنج ہی اوہ چنگے
 مندے، غریب امیر، اپنے پرانے تہ ظالم مظلوم پنج فرق محسوس کرن لگی
 پیا۔ ظالم نیاں چالاں تہ مظلوم نیاں مجبوریاں تھیں اوہ سخت واقف
 ہوئی گیا سا۔ کدے کدے اوہ دکھیارے جیسے شعرو وی پڑھنا
 سا جیہڑے اُس نے دلے ور آپوں نقش ہوئی جانے سن۔

گلزار اجاں کہاں نی پہری موہنڈے ورؤں لاہی وی
 نیہہ سی جے شاہ ہوراں اُس کی بھائی سخت لہر کیتی ”اتھ تو اہری تری
 پشت ہنڈنی ہے تہ تُو ہیں جے، اتانمک حرام..... اتنا.....؟ جیہڑا
 سنے اوہ دنگ رہی جائے۔ نمک حراماں، بے شرماں، تُو ماہڑے ببلو،
 تُو تہ تُو نے سامنے کدھرے کجھ شعر پڑھے ہیں، اجاں تہ تُوں ان
 پڑھ ہیں تہ جے پڑھیا نا ہونا.....؟“ شاہ ہوراں دند

رکے، فروی غصہ ٹھنڈا نہ ہو یا تہ آکھن لگے ”چالی سال ہوئے
 ، شاہ کول، رچی روٹی نہ کھادی، گوڈیاں تہ تالیاں کیتیاں تہ پتہ نیہہ ہور
 کہہ کہہ بکواس بکنار ہیا ہیں کمییاں تہ بد بختا عمر ساری نیاں۔“
 ”شاہ جی.....! اوہ شاہ جی میں تہ جانی بجھی

کوئے وی شعر نہ پڑھیا تہ نہ پڑھن نی شوق ہے، پتہ نیہہ رکیاں ایہہ
 شعر روز ماہری جیوے ور آنے رہنے ہین تہ میں وی سُننا رہنا
 ہاں۔“ گلزار نی بیکسی تہ ظالم نے ظلماں نا خاصے چھٹ چنگوڑا ہونا
 رہیا۔ ”بلو، اوہ بلو، چنٹو تہ پتو ادھر آؤ ادھر شاہ ہور گئے، دہسو اوہ
 شعر جیہڑے ایہہ کمییاں پڑھنا سا؟“ بلو تہ چنٹو تہ سکول نا سبق وی
 کدے یاد نہ کری سکے سن ور پتو دو قدم اگے ہوئی آکھن لگا ”ڈیڈی،
 مکی ہوئے چالی سال، اتھے خدایا توں..... پتہ نیہہ کہہ کہہ کر
 انہاں نا بیڑا غرق تہ ڈیڈی لمیاں لمیاں، تہ مندیاں مندیاں گالیاں
 سن۔

”بول کمینے..... سنا آپوں اوہ شعر سنا، نیہہ تہ

اتھے ہی زمین بچ گڈی چھوڑساں“ شاہ ہوراں نالہرنال مہنہ
لال ہوئی گیا۔ گلزار بڑی ہمت کیتی تہ بے خوف ہوئی آکھیا ”مکی
پہانویں تہا ہڑے کھڑ کوئے چھ سال ہوئے ہین ور میں انہاں کی چالی
سالاں تھیں وی زیادہ سمجھناہاں تہ فراپنے ایہہ شعر اچیاں اچیاں سنان
لگا:

بڑی سوچ ڈڈہنگی تہ میں ہاں سوالی
نہ اج موڑیاں اے خدایا توں خالی

تنگی تہ پتہ ہے، تہ سب راز جانے
جے کس نال ہوئے مکی سال چالی

کدے راج کے کھاہدانہ کپڑے ہی لائے
رہیاں کرنا گوڈی، تہ تہائیاں نی تالی

پندراں نے سٹھ جا کے دتے میں شاہ کی
شکر ہے اجاں ساں میں شاہ جی نا ہالی

مُصیبت میں تنگی، بڑی جان ماری
اوہی ماہری چھنگی تہ حالت ہے مالی

بغاوت جے سمجھیں، تہ بیشک سمجھ لے
ہُن کم اوہی کر ساں، جیہڑا وہے مثالی

ساون مہینے نی اوہ مُلکھ کالی رات، بدَل گننا زیادہ تہ برہنا
کہنٹ، کسیاں ناشدکار کناں کی چہنپے لانا تہ چلیساں کڈھنا، مگّاں ہر
پاسے نسر یاں نیاں تہ ساری بستی نے لوک سٹتے نے، اج گلزار کی
قدرت نی دتی ذہانت نا احساس ہون لگا۔ ”جاں کہ نہ جاں.....؟ جاں
وی تہ کیہنڑوے پاسے؟ کیہنڑا ہوسی جیہنڑا ہمدرد بنی ماہری مدد

کرسی.....؟“ورگلزار اِج کسے وی قیمت ور بڑی
سرکار کول رہن واسطے تیار نہ سا۔ آخر گلزار راتورات اوہ بستی چھوڑی
دور بہوں دور اپنی منزل نی تلاش بچ ٹری گیا۔



اِج گلزار انصاف نی کُرسی ور لوکاں نی خدمت کرن بچ
مصروف ہے تہ اُدھر بلو کی تہاڑ جیل بچ دسواں سال ہے، چٹو شراب
نی مستی بچ کہنر آنا ہی نیہ، اک بٹو ہے جیہنڑا کہنر نے کم کاج نی وجہ
نال سکول چھوڑی گیا اس طراں شاہ ہوراں نی اوہ شان تہ شوکت باقی
نہ رہی۔

کدھرے چٹو، بلو تہ بٹو شاہ ہوراں نیاں ”عملاں نی مار“
اگے تہ نیہ آئے نے.....؟



اوہ سن ترے



اُرار لے پاسے سڑک نے دوہاں پاسیاں ترے سو،
 ہٹیاں آلا بزار تہ پار لے پاسے دو مٹھیاں مٹھیاں بولیاں بولنے آ لے
 پہاڑاں نے لم تھنڈ ننگے پہاڑی تہ گجر جوان، کجھ لُنکیاں بنھی الغوجے
 بجان نے شوقی تہ کجھ گتکے باز، بچ بچ لُون آلی چاہ پین نے عادی تہ
 کدھرے کدھرے دیوی دیوتاواں نے مننے آ لے تہ گردوارے جان
 آ لے پہاڑی پہر اتہ ثانویں ثانویں قہوہ پین آ لے پنڈت، بشکار دریا،
 دوہاں پاسیاں سوہنیاں اُچیاں ہاہلیاں، نیلے نیلے تلے ٹھوکاں تہ بہکاں،
 پانیاں نے شکار، چھمتاں نی پھوار، ہناس تہ بدلاں نے تڑکار، چیتیر

نیاں چہڑیاں تہ فر تِلکن تہ دِبار، کُٹو تہ کویلاں نے مٹھے
 مٹھے گیت، ہڑدلیاں نے پُھلے رتے رتے پُھل، سوہنے تہ مٹھے میوے
 ، بیڑ، تِنگ، چیر تہ چڑی نے جنگل تہ گنے گئے رہیں تہ برائیاں نے
 یوئے، پیار تہ محبتاں نے انبار، اک دُوے نے آنا جانا، ریتاں تہ
 رواجاں نے ٹھیر، دیوالی وہے یا عید، گر پُرب وہے یا کوئے ہوو
 تہوار، اک سانجھ سمجھو ساریاں کی وراثت بچ لکھی نی سی
 وراثت بچ۔

نیلے نملوں ان کڑ کی پئی، قہرنا چھٹکھو چھٹلیا، جبرنا لے
 ظلم نا پھانڈا پھریا، ظالم تہ بہوں ظالم ڈنڈول آیا، سب حیران
 ، سارے دڑکے نے، ہر اکس نامنہہ سگانا، پھانڈے چھٹکھو تہ ڈنڈول
 اپنی اپنی زور آزمائی کیتی تہ کجھ کھڑ پوری طراں اُجاڑے، بہوں
 سارے بچے یتیم ہوئے، کجھ اٹے، کجھ لُہلے تہ اسے طراں کجھ کجھ تہ
 بہوں کجھ ہونا رہیا۔ اوہ لوک جیسے سڑے اُراووں پار تہ پاروں اُرا رہیہ
 آئی سکے سن ہُن اُرا پار آن جان لگ پئے۔ تہ اک وقت اجیہا

وی آیا جے فر نوں نوں محلّے بنے، نویاں نویاں بستیاں
بسیاں وراںسانی کپٹاٹکی اجاں وی پوری طراں بند نہ ہوئی۔

”اوہ سن ترے“ ناں بڑے سوہنے سوہنے، رہنے آلی جگہ، نہ
کچھو، سیالا وہے یا برہیا، رب سچا بولنا، نہ اتنی ٹھنڈ تہ نہ اتنی گرمی، اوہ
ترے بڑے چنگے، دہسنے پنج بڑے ہمدرد، خدانی ذات کی مننے آ لے تہ
تہ اُس تھیں ڈرنے آ لے، لوک سارے سوچنے سن جے تائیں پھانڈے
تہ ڈنڈاؤل نا اثر اہاں ورنہ ہو یا تہ اوہ اجاں وی اپنی بستی بچوں ادھر ادھر
نہ ہلے۔ اسراں پنج سال ہو گزرے تہ تہ ایہہ لگنا سا جے اُنہاں تریاں
اک شرط لائی نی ہے۔ کیاں جے تریاں ترے چنگے چنگے مکان بنائے
، اکونقشہ، اکو جے کمرے تہ اکو جی سوچ۔ اندرو اندری کہ ہونا سا ایہہ اوہ
جانن یا رب سچا، ور لوک اجاں وی اُنہاں تریاں ورسخت اعتبار کرنے
سن۔ اتھے توڑی گل بچی گئی نی سی جے اُنہاں نے کہہراں واخ جانی
بکھی کوئے کنڈھ وی نیہہ موڑنا سا۔

”ہے سن تہ اوہ ترے، ور کیمڑے ترے.....؟“ جیہہ

اندر نے آدم کی کچھیا ”دھساں.....؟“ وراندر

نا آدم نہ منیا، جے منے تہ یقین نہیہ آنا، یقین آوے وی تہ کسرا، دل
منے تہ منے رکیاں؟ جیہہ ہلے تہ ہلے کیوں اج توڑی گجھ ہور تکیا، اج
توڑی گجھ ہور سمجھیا، اج توڑی گجھ ہور منیا تہ اج توڑی کسے ہو دنیانی ہوا
کھاہدی۔ خدایا کیمہڑا وقت تکنا پیا.....؟ مولیٰ رکناں
نال دوستی لائی.....؟ اللہ کھجیاں نال دلاں نی گل کیتی؟ کیمہڑا
ہے جیہہڑا دل نیاں گلاں سنی زخماں ور ملماں لاسی؟ کون ہے تہ کس کی
ماہڑے اندر نے آدم نے اتھرواں نا احساس ہوسی تہ کس کی پہنرا بنائی
تہ بانہہ بنا ساں؟ ورا ج تہ میں سچ آکھساں ہی آکھساں، آکھاں وی
رکیاں نہ؟ اج ہی تہ مکی پتہ لگا ہے، اج ہی تہ مکی خبر ہوئی ہے، اج ہی
تہ ماہڑے نال وی اوہی گل ہوئی ہے جیہہڑی اج توڑی ماہڑے جیے
لکھاں لوکاں نال ہونی رہئی ور مکی پتہ نہ لگا، میں آکھنا ساں جے چونی
لال ایویں کرنا ہے اس نال رام اوتار جیہا آدمی کدوں برائی کری سکنا
ہے؟ اوہی رام اوتار جیہہڑا بند را بن جیہا تہ پلایا جتھے کسے زمانے

محبتاں فی سوتنی سوتنی بخیلی بخیلی سی۔ اوہ سوتنی جگہ چھوڑی رام
 اوتاروی اتھے آباد ہو یا جتھے اوہ باقی دووی رہنے سن۔ ایہہ کسراں ہوئی
 سکنا ہے جے چونی لال فی اگو تھئی فی عزت لٹان آلا، اپنیاں کولوں
 لٹان آلا تہ جوان پتر کی مروان آلا کوئی ہو رہیہ رام اوتار ہی اے۔
 میں سوچیا وی نہ سا جے ناک سنگھ ایہیہا ہوسی جیہڑا ہر وند سنگھ جے
 شریف انسان کی دو سال واسطے جیلے پنج بند کراسی جیہڑا ناک سنگھ
 نکانہ صاحب جی زیارت چھوڑی اتھے آباد ہو یا جتھے باقی دووی رہنے
 سن تہ میں فضل دینے کی بہوں واری چنگا مندای آکھیا جے نور الہی جیا
 آدمی مکے پاک تھیں مری تہ اج میر شریف چھوڑی اتھے تو اہڑے نال اتنا
 بڑا حادثہ میہہ کری سکنا ہے، میں کسراں مٹاں جے تو اہڑے مھل تھی
 سوہنے تہ نازک پچیاں نیاں لاشاں نہ لسمن تہ اس پنج نور الہی نا تھہ
 ہووے۔ مکی یقین نہیہ آنا، ماہڑیا اللہ میں ایہہ کہہ سوتا؟ وراج مکی
 یقین کرنا پیسی، اج فضل دینے فی گل منی پیسی، جے اج وی نہ مناں تہ
 ایہہ فضل دینے نال زیادتی ہوسی، اج وی سچ نہ آکھاں تہ مری

کہ جواب دیساں؟ اج وی نہ سمجھاں تہ آن آلیاں نسلاں نال
 زیادتی ہوسی تہ اوہ وی کدے اساں کی نیہہ بخشن لگے۔ ماہڑا دل اجتیں
 وی نیہہ منا، اوے چونی لالا، ایہہ رام اوتار جس نے متھے تِلک ،
 سرے ور چوٹی، ہتھے بچ گیتا تہ پنڈت بنیا نا، اوے اس نے چھانو لے
 کولوں اج دیوی دیوتا وی تہ ڈرنے ہوسن اس کولوں تہ توں لکھ واری
 چنگا، واہ پہنائی واہ، نہ کسے نی چنگی تہ نہ مندی، اوے کماتے اوے کھا،
 ماہڑے پہنانے تہ ہر وند سنگھ کروڑ درجے بہتر جیہڑا اگر گردوارے
 نیہہ جانا ور دوواں وقاں نی روٹی آپوں کمائی کھانا تہ کہہڑ آلیاں کی
 کھلانا، ناک سنگھ ہاروں گردوارے تہ اُس نا ناں سنی نیہہ کمنے،
 اوے فضل دینا تو اہڑے وروں لکھ واری صدقے، اوے توں گارے
 بچ میہلی پہانویں پیسے کمائے تہ روٹی کھاہدی ورنور الہی نے ہتھے بچ
 تسبیح اٹھو پہرتکی، نیلے پیلے گروتے لانے تکیا تہ قرآن پاک نیاں
 سورتاں نی تلاوت وی کرنیاں تکیا ور بے نمازیاں کی نماز آلے پاسے
 لانیان کدے وی نہ تکیا، ماہڑی گل چھوڑ ویکھی انہاں تریاں رلی

کھنگنی چکان آلی گل کیتی سی ورجس کی رب رکھے اس کی کون
 چکھے؟ اوے چونی لالا اوے ہر وند سنگھاتہ فضل دینا جاں وی نیہہ سمجھے
 ، اجاں وی نہ پتہ لگا، اجاں وی نصیحت نہ لگی؟ نانک سنگھ ہووے یا رام
 اوتار تہ پہانویں تُو رِ الہی پہلاں سمجھو پرکھو تہ فر کسے وراعتبار
 کرو۔ اوے ایہہ پیسے نے پھنکھے پہنکیاڑ وطن دُشمن تہ انسان دُشمن
 قیامت توڑی پیدا ہونے رہسن، ورتس اپنے اپنے دین تہرم وراقائم
 رہئی تہ اک بنی رہیو، نالے اجیئے دُشمنناں نامقابلہ کرنے رہیو۔



مجبوری



کلکھتہ شاہ کالی ساون مہینے فی اک رات تہ اُپر وں کدھرے
 چھڑتہ کدھرے نمل ایہہ تہ اسراں فی گل ہوئی جے گدڑتہ اوہ وی سجیا
 نا، نہ پچھو ششکو اسراں لگنا سا جے کوئے ناساں اُپر پنچ چھ مٹکے ماری
 کو لے دڑکی جائے تہ خبر نیہہ ہونی۔ پچھوں پچھوں دُور دُور توڑی رکھاں
 نے لے لے کہا ہنچ بنانے کدے بلنے تہ کدے نکھنے سن۔ نہ ساں نہ
 سوں، نہ کوئی گل نہ رولا، نہ پھانڈا نہ چھنکو، جتھے جتھے اشان ورنمل نے
 ٹا ہو کیاں ورنظر پینی سی تارے بلنے تہ نکھنے دہسنے سن، ورنرضیہ نے کہہر
 نے کھبتے پاسے کوئے پکھنوں زور زور نال بٹے نال چھڑیا نا

اپنی زبان بچ اللہ پاک فی یاد بچ مست سا، پتہ میہ اس فی لمی
تہ بہوں لمی ٹر..... ٹر..... ٹر بچ کہ کہ رمزاں سن؟ رضیہ اس فی
آواز کی کن نہیں کھڑکیاں کھولی سُننے بچ مصروف سی تہ اُس پسار نے
بڑے ہقم نال پچھن جیٹا لایا نا سا، پتہ میہ اوہ سوچنے سوچنے اتھرواں
نے ہارکتیاں پروں لگی۔؟

رضیہ بانڈی نے کھتے پاسوں گوہاسمری گاں کی کہاہ
باہن لگی سی تہ اجاں لو آلتا را خاصہ اُپر وی میہ آیاناسا تہ اسے سوچ بچ
جے اُس نا پہا پہا ج پوڑے چھ مہینیاں تھیں منجھے لگا نا ہے، اس واسطے
صاؤ دانہ کتھوں آسی؟ پتہ میہ پہا پہا وی اتماں تہ رشید بیر ہاروں
چھوڑی کدھرے دوڑنہ چلا جائے، رضیہ فٹ پہمت کھولیا تہ کتھے آلے
پاسے دوڑن لگ پئی۔ پینڈا پہانویں لمانہ ساور مڑی پہا پے کی ساؤ
دانہ بنائی تے دینا سا اسے واسطے اس دوڑ لائی فی سی۔

”ہائے سوہریے قسمتے، عمر گزری ور ماہری تنگی نہ

گئی۔“ لکڑیاں نا پہار سٹیاں ہی ایہہ گل پہائی کے نے مونہیں

بچوں نکلی ہی سی جے رضیہ ور اُس نی نظر پئی۔ ”رضیہ تھیے
 ، سرگی ویلے کہل مکھلتی تو سدھر.....؟ پہائی کا کابل تہ ہے
 نا.....؟ تو کجھ بولنی کتیاں نیہ؟ کسے ماریا؟ گال کڈھی؟ مکی
 دہس، پہانویں مکی نمبردار ہور جیل کرائی چھوڑن ور میں اُس کی زندہ نہ
 چھوڑساں جس ماہری تھی رضیہ کی چنگا مندا آکھیا ہووے۔“ اج
 زندگی بچ گلاں نا پہلا انقلاب ساجیہڑا رضیہ نے سامنے پہائی کے ڈر
 چہنک بغیر آندا سا۔ ”نیہہ چاچا کماں نیہہ، مکی تہ ترے سو روپیے لوڑنے
 ہین تہ میں سُنیا نا ہے جے لالہ ہری چند ہور سو دے ور اوکھے ویلے
 ہر کسے کی برتنے واسطے رقم ضرور دینے ہین۔“ رضیہ اجیئی عاجزی نال
 گل کیتی جسراں پہائی کماں ہی لالے ہری چندنی ساری دولت نا مالک
 وہے۔

کیاں..... اوہ کیاں..... کتھے مر
 گیا ہیں؟ ذرا پھمت تہ کھول“ لالے ہوراں نی گج سنی کماں پہائی بہلا
 بہلا پھمت آلے پاسے دوڑیا۔ اجاں پھمت ادھا ہی کھلا

ساجے لالے ہوراں نی نظر رضیہ ور پئی۔ ”ایہہ کتھے نی گڑی
ہے تہ اتھے کیوں کھلی ہے؟“ لالے ہوراں کھو ہریاں نظر اں نال
دیکھنیاں پہائی کئے کی کچھیا۔

”میں ہاں..... میں، لالاجی، رضیہ..... اسے گراں
نے محلہ پٹی نی رہن آلی، مکی ترے سو روپیاں نی سخت ضرورت
ہے، لالاجی کہ دستاں؟ پہا پہا ہور سخت ماندے ہین، ساڈو دانے واسطے
وی پیسے نیہہ تہ اس امید نال تساہڑے کول آئی ہاں جے ٹس ایہہ رقم مکی
سو دے وردیسی ماہڑے پہا پے نی زندگی بچان بچ ماہڑی مدد کرسو، میں
ہر کسے کولوں سُنیا نا ہے جے ٹس ہر مجبور نی مدد کرنے بچ کوئے کسرباقی
نیہہ چھوڑنے۔ میں تساہڑے پیسے سو دسمیت تاولیاں موڑی دیساں
نال لالاجی کہڑے بچ اک آئو دے دین آلی ککڑی وی ہے جیہڑی
ٹساں نے کھانے واسطے ہنئے کسے ہتھ پہنچساں یا فر چا چاکماں تساں
کول پہچائی چھوڑسی۔ ترے سو روپیئے میں اس واسطے وی معنی ہاں
جے خدا نہ کرے پہا پے نال کی پیشی ہوئی جائے تہ اُس نی

قبرے ورمٹی تہ پھرائی سکاں۔ لالاجی ایہہ وی ہوئی سکنا ہے
جے غریبی سمجھی تہ کوئے قبر کڈھنے آلا وی نہ لیھے رضیہ روئی روئی عرض
کیتی۔“

”ترے سو روپیے، چل چل بڑی آئی روپیے لین آلی۔ اج
سویرے ایہہ کتھے دی بلا متھے لگی ہے.....؟“ لالا ہور گئے تہ فر
تھے نی نڑی ہتھ بچ پکڑی تہ سؤ ٹالان لگے۔ پہائی کماں وی چلم ہنی
بڑے اندر پتہ نیہہ اک باہنے واسطے ٹری گیا تہ رضیہ کھلی کھلی خاصہ
چھٹ سوچاں بچ ڈٹی رہی تہ فر اُس اک ساس ماری اسرا لگنا سا جے
اُس نی اک ساس نال ہزاراں ہری چند جیئے لالے تہ اُنہاں نیاں
دولتاں سڑی جاسن۔ فر اُس ہمت کیتی تہ آکھن لگی ”ناں بڑا تہ گراں
اُجاڑ، لالا اُنن پہا پاپا ہور پہانویں اللہ کی پیارے ہوئی جان ورتوا ہڑے
جے تھر دل انسان نے یو ہے ور کدے نہ آساں، تہ اک ماہری دُعا
ہور وی ہے جے اللہ کسے وی مجبور کی تو اہڑے جے انساناں نے یو ہے
ور نہ آنے۔“

ادھی قبر کڈھی نی سی، بہوں سارے گرائیں جمع سن تہ
 رضیہ وی سروں نگی دوڑنی کہنر پُنجی، اچن چیت گاں سن اپنا سنگ بانڈی
 نے بشکار لے لہتم نال زور نال ماریا، رضیہ تر بگی تہ اکھیاں ملنی ملنی اٹھی۔
 اُس کی فکر ہوئی جے وہے نہ وہے اُس نا پہا پہا اُس کولوں دُور نہ چلا
 جائے تہ اُس نا ایہہ سیرا سیرا اتکیا نا خواب سچ نہ ہوئی جائے۔ اوہ بہلی
 بہلی اپنے پہا پے نے سرہانے جائی کھلتی تہ پہا پے کی بلان لگی، اوہ
 آلے مارنی ریتی تہ اپنے پہا پے کی ہلانی جلانی ریتی ورا اُس نے
 پہا پے اُس نی مجبوری نہ سمجھی تہ اُس کی ہمیشاں واسطے کہنلیاں چھوڑی
 اُس کولوں دُور بہوں دُور کسے ہور بستی جائی ڈیرا لایا۔ اوہ نہ بولیا تہ نہ
 قیامت توڑی بولسی۔



پالسی



مکی چنگی طراں یاد ہے جے زندگی نی پوہڑی نا نوام
 پاہنگا چڑھیاں جدوں میں پنجی جماعت نا طالبِ علم ساں، بکلی جی
 چھنگی پنج اک کھندولا، دو کھیرے، اک پرال نیاں رسیاں نال بُیا نا
 منجا، دور کا بیاں، دو کتیاں، اک کؤزہ، اک لحیف تہ اک لُنڈی گاں
 اساں نے کھڑ نیاں پنجاں آدمیاں واسطے زندگی نی ضرورتاں نا اٹاشہ
 سا۔ اللہ معاف کرے، اساہڑی لُنڈی گاں پکا ادھ سیر دُودھ دینی سی،

جس کی تہیناڑی چار چوگ کے پرال نے منجے نیاں دانو ناں
اُفراں کر کے بندھ چھوڑنے ساں تہ اسراں اوہ چھنگی کدے بانڈی تے
کدے ڈیرا اپنے آپ ہی بن جانی سی۔

ماہرے اپنے محلے فی مسیت نے بڑے دروازے نے بچے
کھبے لکڑی نا بہوں سوہنا جنگلا بہشتی چاچے بہادر علی خان ہوراں لوایانا
ساتہ کدے کدے برہیا نے دو مہینے نیاں چھٹیاں نا سکول نا کم اسے
مسیت اندر کرنا ماہرا معمول سا۔ دو ترے کہنے لکھن لکھان تھیں
بعد تھ پنج ڈنڈی دہنی میں اُس جنگلے نیاں لکڑیاں کی اسراں کُٹنا
ساں جسر اں کسے چور، قاتل، ڈکیٹ یا بدمعاش کی پولیس جُرم تھیں
زیادہ پیسے نہ لہن ور کُٹنی ہے۔

وقت گزریا، لوکاں نیاں حالتاں بدلایاں، کچھ بنے تہ کچھ
بگڑے تہ فراک اخلاقی تہ سیاسی انقلاب آیا۔

اج سارے شہر پنج موت نیاں وارداتاں ور پولیس
نے بڑے افسر نہایت دنگ سن جے کدھرے نو جوان گڑی فی

لاش لہسنی ہے تہ کدھرے کوئے نو جوان بٹے نال لڑکیا نال می
 نیندر ستانا ہونا ہے۔ کسے بڈھی نی سڑی ترگی نی لاش کسے کھڈ پچوں
 کڈھی جانی ہے تہ کوئے منگن آلا سڑک ور ٹھنڈ نال ٹرڑ ہو یا نا اکھیاں
 ہگاڑی اپنے لوکاں واخ ٹر ٹر تکنا ہے۔

تھانے دار اکرم کی اپنے تھانے نے اندر پین آلے علاقے پنج
 روز دو مہینے تھیں ہنی دوہاں سالان نیاں بچیاں نیاں لاشاں لہسن ور
 سخت پریشانی سی اُس نی سمجھ پنج کجھ نیہہ آنا ساتھ اوہ سمجھنا سا بے بچیاں
 کی پکڑن آلا کوئے گروپ پیدا ہوئی گیا ہے جیہڑا اس قسم نیاں
 حرکتاں کرنا ہے۔

اج ایس پی صاحب سن اکرم کی بلا کے بس ترے تھیٹاڑیاں نی
 مہلت دتی سی جے اس گروہ ناپتہ لا کے فوراً گر فتاریاں کرے، بیہہ تہ
 اپنی نوکری تھیں ہتھ پیر تھوئی چھوڑے۔

جس جگہ بچیاں نیاں زیادہ لاشاں لہھیاں سن، اج اکرم سن
 اُسے جگہ اک ڈوگی نے بنے منڈھ ساری رات اکھیاں پنج

کدھی۔

لو آلا تارا خاصہ اُپر آیا ناسا۔ لکڑوی بانگن لگ پے سن تہ اُس کی
اک چھانولا جیہا جانے لبھّا، اکرم پندراں بیہہ قدم اُس نے چکھے رہ
کے بلیں بلیں اُس نی تاڑنچ ٹرن لگی پیا۔

نِلی نِلی لو ہوئی گئی سی، چھانولا ہُن یا لکل پچھانیا جا سکنا
سا، اُس ہتھاں نال ریت اُراں پراں کیتی، ادھر ادھر تکیا تہ کھڈنچ کُجھ
رکھی تہ اُپر ریت پرتی۔ اکرم جیہڑا اُس نی تاڑنچ سا، شپ کری اُس
کی بانہہ بچوں پکڑیا تہ رُعب نال کُچھیا۔ ”تیرا کہ ناں ہے؟“
”کر میاں حضور“

”اتھّے کہ کرنا سیں.....؟“ اِس سوال نا جواب
کرے تہ نہ دتا ور ریت بچوں اپنے دو سال نے بچّے نی لاش کدھی
جیہڑی اُس نی تہ بند نے اک سرے تھیں پھاڑی نی ٹاکی نال کفنیری
نی سی۔ فر کرے نیاں گلاں سنی اکرم کی اتجی غشی آئی جے اُس کی اُس
ویلے پتہ لگا جس ویلے اوہ ہسپتال نے وارڈ نمبر چارنچ سا۔

اج اکرم چنگا بھلا ہوش بچ سا، ایس پی صاحب تہ ہور کجھ
 افسر اُس نے سامنے سن، اکرم ایس پی صاحب کی بس اتنا آکھیا جے
 صاحب بچیاں نیاں لاشاں نافِ مہ دار کوئے گروہِ بیہہ بلکہ ایہہ پہنکھی تہ
 لسی نالے ماڑی ماؤ نے پیٹوں جتے، دوائی واسطے پیسے نہ ہون ور
 نمونیاں نے شکار تہ سڑک ور رہن آلے سردی بچ سڑی تہ مرن آلے
 بچے ہین۔

ایس پی صاحب نے اشارہ کیتا تہ باقی افسر دروازے
 تھیں باہر چلے گئے، فر اکرم کی ایہہ تاکید کر کے ایس پی صاحب وی
 مڑی گئے جے اوہ اس راز کی راز ہی رکھی رکیاں جے حکومت نے
 اجاں انہاں لوکاں واسطے واضح پالیسی بیہہ بنائی۔ ایہہ اساہڑی نوکری
 نی مجبوری ہے، اکرم نوکری نی مجبوری.....!



کمال



کہ دہساں تہ کس کس فی تہ کیہڑی کیہڑی گل
 کراں؟ انار کلی بزار تا تہ ایویں ناں مشہور ہے۔ جے کسے
 نظارہ کرنا و ہے تہ اس تھیں وی چنگے سوہنے تہ من موہنے بزار دنیا اندر
 ہو رکئی لٹھی جانے ہین۔ ایہہ اللہ فی تہرتی جے ہوئی، اُس اگے کوئے
 کی تھوڑی ہے، بس کی ہے تہ اسا ہڑیاں نظراں فی، کہا تا ہے تہ اُتھے
 توڑی بجن نے ذریعے نا۔

دِہسن بچ پہانویں ایہہ ۳۰۰ ہٹیاں آلا بزار ساور اس فی
خوبصورتی اتار کلی بزار کی چکھے مارنی سی۔ تقریباً زندگی فی ہر ضرورت کی
پورا کرن آلیاں چیزاں بستاں اس بزار اندر موجود سن۔

دوہاں پاسیاں اُچیاں اُچیاں ماہلیاں جہاں ورواہ واہ
نیلے تلے، ٹھوکاں بہکاں، انہاں ماہلیاں نے مُنڈھ لوک آباد سن جتھے فی
ساری بستی اندر مُجبتاں نے ٹیہتر، واہ واہ ہمدردیاں، سارے دُکھ سکھ
نے پہائی وال، اکس نے پیریں کنڈا چھتے تہ سارے حاضر، نہ کوئی
فریب نہ تہو کھا، نہ چوری چکاری، نہ خیانتاں، تپتہیاں پہنتاں نیاں
عزتتاں محفوظ، لیتریاں ہون یا لادیاں، غمی وہے یا خوشی دُڈھ، مکھن
چاول، چھنی تہ بسکٹ سمیت سارے حاضر، آؤ جی، بہوؤ جی، صدقے،
قربان۔ انہاں گلاں تھیں ظاہر ہے جے اک جنت نا نقشہ سا جیہڑا اس
دُنیا نے مہنویں ورساریاں نے دِلے نا ٹھنڈیا رسا۔ اس سارے منظر
کی اجیئی نظر لگی، اجینا پھانڈا بھریا، اک اجیئی ہل چل ہوئی جے اُس
کولوں پہلاں تہ کوئے نہ بچ سکیا تہ اگر کوئے بچیا وی تہ نانواں

ٹانواں، اوہ وی اپنی ہشیاری تہ چالاکی نال۔

اج خضرے کی اپنے بابے فی یاد ہورناں تہیماڑیاں تھیں کجھ زیادہ تنگ
کرن لگی تہ اُس اپنے نکلے پہر اشوکت کی اپنے کول بلایا۔ آکھن لگا ”آ
یرا آ..... آ آناوے..... دوے پہر ارجی گلاں کراں، تہ بابے
بہشتی نے ارمان پورے کرنے واسطے سوچاں، جس پہاڑے نمبر دار
ہوراں نال ساری زندگی کٹی شوڑی، بلوچ کیتی، لوکاں نیاں منجھیاں
چاریاں، پانی ٹھوے، مٹھیاں مکیاں کیتیاں، گالیاں تے ماراں
چھلیاں، تہنکے تہ ٹھیلے کھاہدے ور اساں کی زمانے فی تہی ہوانہ لگن
دتی، اساں کی پڑھایا تہ پنجمی جماعت توڑی پچایا، عمر ساتھ نہ دتا تہ اس
زمانے نے چھکھڑ تہ ڈنڈول پتہ میہہ کتیاں اساہڑے بابے کی اساں
کولوں کھستی دؤر بہوں دؤر پتہ میہہ کیہڑے ملکے ناسدیک بنائی چھوڑیا
.....؟“

”خضرے..... اوہ خضرے.....!“ اک موٹی جینی

تہ دبے آلی آواز دوہاں پہر اواں کی چپ رہنے ور مجبور

کیتا تہ خضرے پہمت نی دِل پچوں باہر تکیا۔ نمبردار ہور پیتل
 نی شام آلی کھوٹدی وراپنی ٹھڈی رکھی نی سی تہ فر بلان واسطے اپنی
 جیہ کی حکم دینے آ لے سن وراپنی تھیں پہلاں ہی خضرے پہمت
 کھولنیاں ہی سلام آکھیا۔ ”علیکم سلام تہ کرساں ورا خضر یا تو ہڑا پیو اکو
 آواز ورتنکیاں پیراں ماہڑے کھڑے جُنا، ہتھ بھٹی کھلنا، جی جی کرنا تہ
 اساہڑے کھڑے نا کتنا خیال رکھنا سا، اُس نیاں کیمڑیاں کیمڑیاں
 گلاں کراں تہ کہہ کہہ یاد کراں؟ ورتوں تہ تو ہڑا ہڑا پنجی توڑی کہ
 پڑھی گے ہو جے سارا زمانہ ساہدی ہندا۔ تہساں کی ایہہ پتہ نیہہ جے
 ایہہ کیمڑا دور ہے.....؟ تہساہڑے کرتوتاں ورا میں اج توڑی
 پردے باہناں ریاں، وراپنی تھیں چکھے ماہڑا کوئے چارہ نیہہ پہائی
 کوئے چارہ، تہس دوئے اج یا کل جیلے اندر ہو سو جیلے اندر تہ فر مندی
 موت مرسو، مندی موت۔ میں ایس پی صاحب تہ دونیاں ساریاں
 ایجنسیاں کی ضمانت دتی ہے جے اُنہاں دوہاں پھڑاواں کی اپنے کھڑے
 رکھساں تہ ساری زندگی اپنے پہاڑے ہاروں شریف تہ ایماندار

بنی ماہڑا کم کرسن تہ میں اُنہاں کی کوئے وی اجیا کم نیہہ کرن
دیاں جیہڑا وطن دُشمن وہے۔“

”نمبردار جی.....! ایہہ تہ وطن اسا ہڑا
اپنا ہے۔ اساں کی اتھے ہر قسم نی آزادی حاصل ہے۔ اس تہ اپنے
پہاڑے نیاں اُمید ال کی پڑا کر نے تہ اُس نے خواب پڑا کر نے نے
بارے بچ سوچنے ہاں، اس پڑی لکھی چنگیاں پوٹاں ور جائی غریب
تہ مظلوم لوکاں نی خدمت کرنا چاہنے ہاں۔ اس نیک سوچ تہ کم بچ ٹس
وی مدد کرو تاں جے پہاڑے بہشتی کی اُنہاں نی محنت نا اس دُنیا بچ تہ
کوئے بدلہ نہ لیٹھا ور اُس دُنیا بچ تہ کجھ بدلہ لیٹھے۔“

آزادی، پوٹاں، پڑھی لکھی تے چنگیاں.....! ایہہ گلاں سُنی
نمبردار ہوراں کی جیاں سب سونگھی گیا وہے۔ اک خاصے چھٹے بعد
نمبردار ہوراں خموشی تر وڑی تہ بولے۔ ”حضریا تہ شوکتا..... کن
کھولی تہ اکواری فر پڑا تہ تہیان لائی سُنو، اج تہ پہنلکلیں چنگی طراں
سوچی سمجھی ہنو تہ فر ماہڑے کھڑا نا ہو یا تہ آئی جابو ورنہ ماہڑے

تھیں بُرا دوا کوئے نہ ہوسی، ایہہ گل آکھی تہ نمبردار ہور سخت لہر
بچ مہنہ رتالال کری ٹری گے۔

نمبردار ہور کرشن بزازی دکان ورگپ شپ لان واسطے ٹھیک
ترے بجے آن چکے۔ کرشن بزازی اج نمبردار ہوراں نا بیتابی نال
انتظار کرنا سا، اسے واسطے کرشن سن نمبردار ہوراں کی تکلیاں ہی
آکھیا ”نمبردار جی کمال ہوئی گیا کمال، رب سچا جو چاہے سو کرے
، واقعی اج میں تہ اُس نی ذات نا پہلاں تھیں زیادہ قائل ہوئی گیاں
، اُس نی ذات بڑی سوہنی، اُچی تہ سچی ہے۔ اوہ چاہے تہ عزت داراں
نی عزت کھستے یا کسے پھنکھے ننگے کی عزت بخشے۔“ ”کرشن اوہ
کرشیاں ایہہ کہ بھھراتاں باہناں ہیں؟ کہ ہو یا کجھ بول تہ سہی“
”نمبردار جی پڑھو ایہہ اخبار کہ آکھنا ہے.....؟“ ”یرا کرشیاں اوے
ہور کسے کی وے یا نہ ورثکی تہ چنگی طراں پتہ ہے جے میں ان پڑھ ہاں
، ان پڑھ، ہُن سنی ہندا تہ پڑھی سنا کہ آکھنا ہے تو اہڑا اخبار؟ تکی تہ
ایہہ وی پتہ ہے یا نہیہ جے ماہڑے پتراں وی سکول چھوڑی

چھڑائی مندے کم کیتے تہ اج اوہ ساری شان شوکت رولی
 چھوڑی جیسڑی میں ان پڑھ ہوئی حاصل کیتی سی تہ دبدبہ بنایا ناسا، ہُن
 توں آپے پڑھی سناہاں کرشنیاں، بہلا کر ماہڑا کلیجہ تہنک کرن لگی
 پیٹا ہے۔“

”اچھا نمبر دار جی اپنے موٹے کلیجے ور کھتا ہتھر رکھی تھوڑا اس کی
 دبائی رکھو تہ فرسٹو۔“

”کرے سورگی نے دوئے پترِ خضر اتہ شوکت؟“ ”کہ ہو یا
 خضرے تہ شوکت کی؟ اوہ اجیں زندہ ہین دوئے، اوہوے انہاں کی
 بیہ سال ہوئی گے تہ انہاں نا اتنا نہ پتہ، کہہر بار اجڑی مجڑی گیا، زمی
 ڈوگی لوکاں ملی ہندی، اوے اج کہ ہو یا، دہس ہاں یرا، بول تہ سہی
 انہاں کی میں اجیا ڈرایا سا یرا اجیا جے اوہ ایہہ ملج چھوڑی نسی گے
 سن۔“

”زندے ہی بیہ، خضرے کی گورنمنٹ سن ڈی سی پونچھ تہ
 شوکت کی راجوری جج لایا ہے۔ کل اوہ اپنے اپنے عہدیاں نا

چار ج سنبھالی ہنسن، سُنیا نمبردار جی، ڈیر نے کیاں ہو؟ ہوش
 کرو ہوشِ مکی تہ بڑی خوشی ہوئی ہے نمبردار جی، بڑی خوشی ہے اپنے
 گراں نے اک غریب تہ بہوں مظلوم کہترے نے دو پہرا، دوہاں
 ضلعیاں نے افسر بنی آئے ہین، چھڑے افسر ہی نیہہ بڑے پاوراں
 آلے افسر، بڑے پاوراں آلے، ڈی سی صاحب تہ جج صاحب واہ
 پہائی واہ“

چٹ ورنمبردار ہوراں نا ناں تہ گراں درج سا، ڈی سی
 صاحب فٹ چیرا سی کی حکم دتا ہے بڑے ادب نال نمبردار ہوراں کی
 اندر آن نی اجازت دتی جائے۔

اک پاسے مگر مچھ نے اتھروں فرن فرن چلن لگے تہ دُوے
 پاسے پہا پے ورنمبردار ہوراں نے ڈنجیاں نیاں یاداں نے کو سے
 کو سے موتی اکھیاں اندروں بلیں بلیں نکلنے تہ دل کی تسلی دین لگی
 پے، تہ فر ڈی سی صاحب نمبردار ہوراں نا شکر یہ اس طراں ادا کیتا ہے
 ”نمبردار جی تساہڑی تہ تساہڑی اولادنی خیرو ہے جے تساں اک

دن ماہری غیرت کی جگایاتہ میں دُوے تہیڑے ماسٹر
 صاحب کولوں سرٹیفیکیٹ ہنی، ایہہ علاقہ چھوڑی چھڑائی کانپور اک
 سکول اندر داخلہ ہندا، دوہاں پھر اواں سخت محنت کیتی تہ اللہ پاک سن
 عزت بخشی، میں ٹساں کی آکھیا سانا نمبردار جی، یاد کرو یاد جے ماہڑا
 وطن آزاد ہے، اتھے اساں کی ہر قسم نی آزادی نصیب ہے، اساں
 دوہاں پھر اواں اتھوں دُور بہوں دُور جائی پڑھی محنت کیتی تہ رب
 سچے محنت توڑ چاہڑی تہ ایہہ عزت بخشی، ماہڑی ٹساں اگے وی ایہی
 عرض ہے جے اپنی اولاد کی پڑھاؤ تہ اگے بدھن نے رستے دھسوتاں
 جے اس وطن نی شان ہو رہی ہے۔“



غیرت



انور اپنی ڈب نی کھتی ملی نی اُس تراڑ ور بھی اج تھے
 نے لے لے کش لین بچ مصروف نظر آنا ساجیہڑی تراڑ اُس نے
 پہاڑے سیف دین سن بیہ سال پہلاں پندراں جنے اکھٹھے کری
 سیلاں نے گراں بچوں بڑے شوق نال منگائی سی۔ اُس نا پہاڑا کینسر
 جیہی موڈی بیماری نال اُس کی کہلیاں چھوڑی ہشتاں نی دُنیا نا بسنیک
 بنی گیاتہ اس وجہ نال انور نی پڑھائی بس پنجی جماعت تھیں اگے نہ بدھی
 سکی ورا نور کی اپنے پہاڑے نیاں گلاں نا بڑا اثر ہو یا نا ساتھ اسے واسطے
 اوہ غیرت تہ بے غیرتی نیاں دوسدھیاں لکیراں تھیں چنگی طراں
 واقف سا۔

”بچہ انور.....! میں اللہ پاک کولوں تگی متاں منی

حاصل کیتا، پوہرے کئی پالیا، اپنے تہ بیگانیاں نیاں چھڑکاں

چھٹکیاں، نہ رچی کھا داتہ نہ چنگا لایا، تو اہڑے پہاڑے نی مرضی
 سی جے ماہڑا انور پڑھے، اتنا پڑھے جے اک دِن بڑا افسر بنی انہاں
 پہاڑاں بچ بسن آ لے سارے مجبور، پریشان، مظلوم، دکھیا تہ دے
 دبائے لوکاں نی خدمت کرے۔ انہاں نے دُکھ درد بندھے، پڑھنے
 پڑھانے نے اوہ سارے رستے دھسے جیہڑوے ساریاں نی تقدیر بدلن
 تہ اس طراں اساہڑے ساریاں لوکاں نا پہنلاو ہے۔ میں انہاں نا ایہہ
 خواب تہ پورا نہ کری سکی جس نا مگی سخت افسوس ہے، تگی تہ چنگی طراں
 پتہ ہے جے میں بیمار تہ کہنرے نیاں مجبوریاں ور بچہ توں وحید کی بہوں
 پڑھایاں ایہہ ضرور پڑھسی تہ اپنے دادے بہشتی نا اوہ خواب پورا کر سی
 جیہڑوے انہاں اپنی زندگی بچ تکنا چاہیا سا، بس ماہڑی ایہہ دُعا سمجھ یا
 پیشین گوئی۔“

اج چیتر نیاں چھڑیاں مکی مکائی گیاں سن، جردالوں، آروں
 خوبانیاں، ہاڑیاں، پلمپ، بٹنکیاں، ڈوہری ناخ، کوتل ناخ، بگو گوشے
 تہ ہور بہوں سارے میوے دار یوٹے پھلاں نال پہنرے

نے جنت ناظرہ پیش کرنے سن۔

ارار لے پاس سڑک کے نے دو اں پاسیاں ہٹیاں، بشکار دریا تہ
پار لے پاس نیلے نیلے تلے، مرگاں، چوٹیاں، برف، دیاراں، بیڑاں
ریاں، برایاں دھڑولیاں تہ ہور بہوں سارے قسماں نے یوٹے سید،
گوجر، بکروال، راجپوت، کشمیری تہ ہور بہوں ساریاں ذاتاں تہ قوماں
نے بسنے آ لے اُس پار آباد سن۔ ٹانویں ٹانویں پنڈتاں کی انہاں اسرا
چھپائی رکھیا نا سا جسر اگلڑی اپنے بچیاں کی اپنے کھماں ہٹھ بٹھائی
رکھنی ہے تہ آپوں ہمیشاں مصیبتاں، مشکلاں، پھنکھاں تہ خطریاں نا
شکار بنے تھیں نیہہ ہٹی۔

انوراج اُس تراڑ ور بھی ارار تہ پار نا ایہہ سوہنا تہ من موہنا
نظارہ اپنی اکھیاں تکی کدے خوش ہونا تہ کدے رونا۔ شاید اج اُس کی
اپنی امتاں بیشتن نیاں اوہ ساریاں گلاں یاد آئیاں ہوسن تہ اوہ اپنے
وچد کی بہوں دور پہنچی پڑھاں نی سوچ بچ ہوسی۔ اوہ اپنے پہا پے بہشتی
کی دہسنا چاہنا ہے جے اوہ آپوں تہ پہانویں گجھ نہ کری سکیا ور

اوہ حمید کی تہ لکھائی پڑھائی اک دِن قوم نی خدمت واسطے
لاسی تہ فر پہاڑے نی قبرے ور جائی فاتحہ خوانی تیں بعد اُس نے ارمان
پُورے ہونے ور مبارک باد دیسی۔

نیلے نملوں بلیں بلیں کالا تہ بہوں کالا چہرہ کسے پاسوں آیا۔
اشمان جیہڑا راتیں تاریاں نال پہرے یاد ہسنا ہے، تاریاں گی کدھرے
دور چھپائی چھم چھم اتھرواں ناں بدل برہان لگا۔ بجلی کڑکنی تہ ساریاں
لوکاں گی ڈرائی اپنے کہراں بچ ہی دڑکنے ور ہی مجبور کرنی رہی۔
چمکھو تہ ڈنڈول بیٹھ نی تہرتی اُپر کیتی، اپنے بیگانے سارے نفسا نفسی
نے عالم اندر غرق ہوئی گئے تہ فراک وقت ابھی وی آیا جدوں اس گل
ناپتہ لگا جے گراواں نے بہوں سارے لوک اک دُورے کی چھوڑی پتہ
نیہہ کیہڑی دُنیا نے بسپک ہوئی گے سن.....؟ انہاں بچوں انوروی
اک بد نصیب سا۔

اک پاسے وحید نی آن آلی زندگی نی سوچ تہ اُس نی پرورش نا
خیال تہ دُورے پاسے اپنی عزت آبرو بچان نی لکھ تدبیر، انہاں

سوچاں صفدرہ کی سخت پریشان کیتا وراوہ ہمت نہ ہاری تہ گجھ
 مہنے دیکھنے دیکھنے مجبوریاں، مشکلاں تہ مُصیبتاں فی نذر ہوئی گئے۔
 ارج صفدرہ کی چھنکو شاہ ہوراں صلاح دتی ”صفدرہ تو کدوں
 توڑی آپوں تہ اپنے اس مٹوم بچے کی روانی رہیں.....؟ ہُن انور نہ
 تہ مڑی سکنا ہے تہ نہ مڑی۔ ہُن بس ہمت کر ہمت، میں تو اہڑی مدد
 کری سکنا ہاں، جے توں ماہڑا مشورہ مٹیں۔ لوکاں تہ بہوں سارا مال
 جنجال رکھیا نا ہے، وراں لوک بیوپاری ہاں، اساں کی اتنی فرصت کتھے
 جے اس وی لوکاں ہاروں مال بچھا رکھی سکاں فروی گہڑے فی زینت
 تہ عزت شہرت واسطے دو منجھیاں تہ اک گاں اپنے واسطے زوال رکھیا نا
 ہے جس کی سنبھالنا ماہڑے بسے ناروگ نیہ۔ وحید زکا ضرور ہے ورا
 منجھیاں تہ گاں کی پھیری شیریں آنیا کرسی تہ سوہنے تھیں سوہنا لاسی تہ
 کھاسی۔ ریہی تو اہڑی گل تہ توں وی پہناڈے شانڈے مانجھی
 ، کپڑے شیرے تہوئی تہنائی گزارہ کری سکنی ہیں۔ جے تگی منظور ہے
 تہ پہنکلیں ہی دوئے ما پتر کے ور لگی جاؤ۔“ صفدرہ بُت بنی

بیٹھی شاہ ہوراں نیاں گلاں سُنی رہی تہ کوئے جواب نہ
 دیتا۔ صفدرہ پہانویں غریب سی ور اُس نے اندر نہ آدم جاگنا ساتھ اُس
 کی شاہ ہوراں نے اوہ پنجاہ روپیئے اُس نیاں اکھیاں بچ سن جیہڑوے
 اُنہاں انور نے مرنے آ لے دِن ہمدردی نے طور مدد کیتی سی۔ اُدھر
 وحید پہانویں مشوم ساور اُس نیاں رگاں اندراک باغیرت ناخون
 دوڑنا ساتھ اسے واسطے اوہ کجھ بنی دھسنا چاہنا شاید قدرت کی اُنہاں
 فی مجبوری ورسخت رحم آیاتہ اسے واسطے وحید نے دِلے بچ کجھ بنی دھسنے
 ناجذبہ پیدا ہويا۔

مہاراشٹر نے یتیم خانے بچ وحید کسراں بجیا ایہہ اوہ جانے یا
 اُس فی مدد کرنے آلا پروردگار ور جیہڑوی صلاحیت اللہ پاک سن وحید
 اندر گٹ گٹ کے پہری فی سی اوہ اُس وقت سامنے آئی جدوں اوہ
 آئی اے ایس نے امتحان بچوں چوتھے نمبر وریاتہ اک مثال قائم کیتی۔
 ”وحید صاحب.....! تساہڑے پہاڑے بہشتی تہ کجھ نہ
 تکیا، نہ کدے رچی کھاہاتہ نہ ہی چنگا لایا وراج اوہ زندہ ہونے

تہ تہاں کی تکی کتنا خوش ہونے جے اُنہاں نا وچد اِج اپنے
 ضلعے ناڈی سی ہے، شاہ ہوراں نے اتھرواں نا سلسلہ کجھ بدھنا ہی جانا
 سا و وچد کی اُنہاں اتھرواں نا پورا پتہ سا جیہڑے شاہ ہوراں نیاں
 اکھیاں بچوں نکلنے سن۔ ”نہہ شاہ جی تہاں کی شاید یاد وی ہوسی جے
 میں نکا تہ مجبور تہ تہاں نی منجھیاں تہ گائیاں نے ڈکنے نی
 مجبوری.....! میں کوشش کرساں تہ اپنے ضلعے نے چتنے
 مجبور، دکھیا، پریشان، مظلوم تہ دبے دبائے لوک ہین اُنہاں نی خدمت
 کرساں، تعلیم عام کرن نے جتن کرساں، دن رات اک کری ایہجیا
 نظام قائم کرساں جس نے بچ نہ تہ کوئے بڑا وہے تہ نہ کوئے
 نکا، ساریاں گلاں چھوڑ واپنی اماں بہشتن نے ناں ہر مہینے اپنی ادھی
 تنخواہ بیہماں نی پرورش واسطے وقف کرساں۔ انشا اللہ“ اِس تھیں اگے
 وچد کجھ نہ آکھی سکیا۔



افسانچے:



لفافہ



لمی تہ کہنتی جیہئی داڑھی آلاموہنڈے ور ترے سٹار لائی بڑا بابا
رُعب افسر لگنا سا۔ سارے اُس کی تگن نے چا بچ رہنے سن۔ بزاراں،
گلیاں، ہوٹلاں تہ سڑکاں ور اُس نیاں صفتاں ہر شہری فی زبان ورسن۔
”تو کون تہ کتھوں آیا ہیں.....؟“

”جی..... میں..... غلاماں، دمہال ہانچی پورے نا“
”سویرے سویرے، دہس اپنی گل، نماز وی نیہہ پڑھن دینے“
”جی ماہڑا بے قصور بشیر.....“ غلاماں اگے کچھ نہ آکھی سکیا۔
ہمت کیتی تہ اک لفافہ اگاں کیتا۔

”ایہہ کہ ہے.....؟“

”جی سرکار پہلی وار تسا ہڑے درے درے ور آیا ساں، نہ

مٹھائی، نہ لگڑ بٹخ، بس جناب ہی کسے کی پیہنجی.....!“

”پراں ہٹ ووئے، خدا نیاں بندیا، مصلے ورنہ آیاں، اچھا اگر

نیہہ چھوڑ ناتہ جا ایہہ لفافہ عمران فی ماؤ کی پکڑائی چھوڑ۔“



کچھ تہ لحاظ کر



جہلم نے کندے چنار فی چھاں مُنڈھ اک انسانی
جوڑا اس طراں مست نظر آنا سا جسطراں اوہ باقی دُنیا آلیاں کی ایہہ
سکھان فی کوشش کرنا وہی ہے.....! اک مڑگل جہنیا سٹتا
ایہہ نظارہ تکی گُتتی کی چٹن لگا تہ فر چٹنے چٹنے اُس نے مہنہ بچوں اک
جہی اڑوک نکلی ہے اوہ بے شرم حرکتاں کرن لگی پینا۔

”ایویں تہ اساں کی دُنیا وِرد..... وِرد..... نیہہ

کرنی، کچھ تہ لحاظ کر کم بختا..... اوہ اساں کی تیکنے وی ہین تہ اُدھر
اذان وی ہونی لگی نی ہے۔“ گُتتی بلیں ہے آکھیا۔



سگریٹ



اُس نے پیراں پٹھوں جہیاں ز میں کھسکی گئی وہ ہے
یا سرے وراشان ٹھہی پیا وہ ہے کیاں بے اج اُس اپنے لاڈلے سلیم کی
سگریٹ پینیاں تنگی ہند اسما۔

کچھ سوچیا تہ فر کھتے ہتھے نی دواڑ اپنی چھیمی پڑھنے
آلے سلیم بچے نے موہنویں ور جہی چھڑکائی بے اُس نے مہل تھیں
سوہنے ہڑواٹھے ور سگریٹ ناگ آلا پاساک بڑا سارا مہکنا نا چاہڑی
سلیم کی خاصے چھٹ روانا رہیا۔



دو فرق

(۱)



سہاگ رات فی تیاری بڑے چا نال کیتی گئی تہ اس
 کہڑی رونق نا اندازہ اس گل تھیں وی لایا جا سکنا سا بے ٹھول ٹھمکے
 آلے اجاں وی اپنے سازاں کی زمیں ور تھرنے واسطے تیار ہی نہیہ سن
 ہونے۔ ”بد کردار..... بد کردار.....“ اُچیاں
 اُچیاں لاڑی نے مہنہ بچوں سنی سارے دنگ رہئی گئے۔ مہراج جیسڑا
 خاصے چھٹ بعد کمرے تھیں باہر آیا، اُس کولوں ایہہ پتہ لگا بے لاڑی
 کی مہراج اندراج نے زمانے نیاں گلاں بچوں اک وی نہ لہھی
 جیسڑیاں لاڑی سن اپنے ماحول بچ تکیاں نیاں سن۔ ایہہ فرق سا
 دوہاں بچ پہانویں اپنی جگہ اوہ بڑا قابل ڈاکٹر بننا سا۔



فرق

(۲)



اوہ یتیم ور خوبصورت تہ پڑھی لکھی سی۔ سس سوہرے نیاں
 روز نیاں گلاں تہ طعنے مینے سہی سہی داج واسطے اپنی رنڈی ماں کی
 مجبور کرنی رہتی ور.....! شاید اسے وجہ نال اُس کی اُس نے
 خاوندن طلاق دین نا پکا ارادہ کری ہندا۔ تہ فراوہ گل وی اک دن
 ہوئی گئی جس نا اُس کی گمان وی نہ سا۔

پندرہاں سالان نا زندگی نا سفر کہنلیاں گذاری آخر اُس کی
 زندگی نا ساتھی لہتی گیا ور..... اُس فی تہ زندگی نے
 نویں ساتھی فی عمر پنج پنچی سالان نا فرق سا۔ ٹھیک پنچی سالان نا۔



اُنہاں کولوں تہ پُچھو



اوہ دووے اک دُووے کی اکھیاں تھیں اوہلے نہ ہون
 دینے سن ایویں وی اوہ ہانی تہ اکو سکول نالے اکو جماعت نے طالب علم
 سن۔ اج پتہ نیمہ رکتیاں رستے بچ تو تو، میں میں اُنہاں بچ ہوئی جس نی
 بھنک کامران نے پٹیو نے کنے پئی۔

”کتھے رمضان صفائی آلے نابلو تہ کتھے ماہڑا عمران.....؟“
 اکو خلقت اکہنٹھی ہوئی نی سی تہ رمضان کی جوت پریٹ ہونیاں تکی وی
 کسے نی جیہ نہ سڑی جے کامران کی گجھ آکھے۔

تو صفائی آلاتہ اس.....! اسا ہڑیاں ہی بلیاں مُنڈھ رہی اپنے

پترے کی اتنی کھل نہ دیسیں..... جے نہیہ سُنیا تہ ہُن
چنگی طراں سُنی ہُن..... چنگی طراں.....“

پہنپڑ بچوں کوئے بولیا ”کامران جی..... میں
گہمہمایا میں صدقے..... راجہ جی! انہاں کولوں تہ چکھو جیہڑے اوہ
تکو کھتوں وی کھیڈ نے ہِن تہ تساں نیاں گلاں سُنی ہسنے وی۔“



سوسوفون



لاڑی مہراج اک دُوے نی بہوں عزت کرنے سن۔
 اج لاڑی ہوراں تہنیاڑیاں تھیں کچھ زیادہ ہی خوش نظر آنی سی ”ٹس
 روز آ کھنے سو جے کہ لکھنی ہیں، نہ سر نہ پیر ایہہ وی کوئے کہانیاں ہیں
؟ تکو نا ماہری کہانی، ”عورتاں ور ظلم“..... لوکاں کتنی
 پسند کیتی تہ اج پوری تہنیاڑی سوسوفون کری ماہری حوصلہ افزائی کیتی۔“
 ”اڑیا مگی تریہہ سال ہوئے نظماں، غزلاں تہ
 کہانیاں لکھی لکھی قلم کہنسا ئی چھوڑے ور کسے ماؤ نے بچے اک فون وی
 نہ کیتا۔“

”ٹس کوئے؟“ اگے آ کھنے آ کھنے اوہ
 کچھ نہ آکھی سکی تہ اک مُشکڑی پہری کمرے نے دروازے بچوں اندر
 ٹری گئی۔



سب کچھ ٹھیک ہے



اچانک ڈی سی صاحب جموں تھیں مڑنیاں اک لمی بہوں لمی
لوکاں نی لین تہ سلینڈراں نے ٹھیر تکی تہ رُکے، کچھ سوچیا تہ فر لوکاں
کولوں پچھیا۔ ”گیس ٹھیک سے مل رہی ہے نا.....؟ کوئی مشکل تو
پیش نہیں آرہی.....؟“

”جناب.....! گیس تہ قطار بچ لگے نے لوکاں کی کہٹ تہ لحاظ
دار لوکاں کی زیادہ لکھنی ہے تہ اُپر وں دس تھیں پنجاہ روپیاں توڑی کاپی
تہ نہ کاپی نا سلسلہ وی ہے جناب.....!“

لین بچوں اک یاد و نیہہ دساں بیہاں لوکاں سن رولا باہیا۔ ڈی
سی صاحب تحفیلہ ار صاحب کی انکوائری افسر مقرر کیتا نالے

کاؤنٹر اک۔ کلو میٹر دو رہاڑی محلے بچ کھولنے نا حکم وی دیتا۔
 اک مہینہ گذریا۔ نویں کاؤنٹر وروی اُسے طراں نی لوکاں نی لین لگی نی
 سی گجھ لوک اپنے اپنے سلینڈراں ور بھی ہنگلانی سن تہ گجھ اک جنگھ
 پہار کھلی تھکیا مکڈھنے تہ فر دوتی جنگھ پہار کھلی پہلی جنگھ کی تھوڑی چھٹی
 دینے سن۔ اسراں اپنی باری نے انتظار نیاں کہڑیاں کہٹسانے تہ دل
 کی تسلی دینے نا ایہہ اک چنگا ٹہنگ سا۔ اسے دوران دوروں ڈی سی
 صاحب نی گڈی آنیاں تکی پنجاہ سٹھ آدمی اپنے اپنے سلینڈر چھوڑی
 چھڑائی گڈی آلے پاسے دوڑے تہ ہتھ بھٹی ڈی سی صاحب کی آکھن
 لگے ”جناب.....! ہُن سب گجھ ٹھیک ہے۔ گیس وقتے وروی لہہنی
 ہے تہ کاپی شاپی ناوی کوئے چکر نیہہ۔ جناب ہُن گیس آلیاں کی گجھ نہ
 آکھیو.....! گجھ نہ جناب..... گجھ نہ..... نیہہ تہ.....!“



ادیب



”زندگی..... عارضی، بہوں عارضی

موت..... اٹل حقیقت“

مولوی صاحبِ زندگی تہ موت فی حقیقت وراک لیکچر نے
دورانِ زور دے گے آکھیا۔

”نہیہ.....! نہیہ.....!“

میں زندہ ہاں

زندہ ساں

زندہ رہساں تہ کدے نہ مرساں“

دوئے ہتھ اُفراں کری تہ پنجیاں پہار ہوئی اک ادیب بڑے فخر نال
آکھیا۔



خصلت



اوہ چھت ور بیٹھا اُس متوں نے یوٹے نی چھاں بیٹھ
 آرام نال لیٹیا نا اپنے پہا پے بہشتی نی پتہ میہہ کیہڑی کیہڑی گل سوچنا
 ساجیہڑو اُٹا اُس نے پہا پے پندرہاں سال پہلاں بلی مُنڈھ جانی بجھی
 چھاں واسطے لایا نا سا۔ اچانک اُسے متوں نی ڈالی وروں اک کالی شاہ
 کالی کلنی آلا سپ بُنھاں لڑکیا۔

”نہ ڈر..... نہ ڈر.....! اساں سپاں فی ساری خصلت ہُن
 تساہڑے حوالے ہے، اے اج نے انسانو.....! تساہڑے حوالے۔
 ایویں وی تُس اک وڈے کی ڈنگنے نے اساں تھیں زیادہ گُن جانے
 ہو۔ اس تہ اپنے بچاؤ واسطے کدھرے مجبورِی نال کسے کی ڈنگنے ساں ور
 تُس.....؟“ سب ایہہ آکھی رونے آلا ہوئی گیا۔



چل ہٹ


پونچھوں مڑنیاں ماہری نظر اُس پہ پڑو پئی جیہڑی ہاڑی
 محلے نی راشن آلی سرکاری دکان ور لگی نی سی۔ مگی وی خیال آیا تہ اُس
 لگی لین تھیں باہر کھلی سیلز مین کی اشارے نی زبان بچ سمجھان نی کوشش
 کیتی جے بچ کلو چینی.....! بچ کلو۔

”باؤ جی..... یتیم ہاں..... یتیم، پہاڑی ہور دس سال پہلاں مزدوری کری مڑی کہر آنے سن جے رستے بچ کسے فی گولی تا شکار ہوئی گئے..... اوہ تگونا باؤ جی کتنی کنک تہ چاول پیراں پیٹھ رُلنے ہین۔ دو دن ہوئے ما بڈھی تہ دو پہنناں پہنکھیاں تہ میں بہمار.....! باؤ جی“

”چل ہٹ، آیا بڑا یتیم تو اہڑے جیئے روز کتنے یتیم آئی اسے طراں لیہلڑیاں کڈھنے تہ فر مڑی جانے ہین“ سیلزمین کھوہریاں بولیا۔



نکاح



اوہ مندراتہ بے رُعبانا لے پو لاں لان آ لے ناپٹیر۔ برادری بچ
کسے وی اُس کی رشتہ دین نی حامی نہ پہری تہ فر اُس ناسخت پریشان
ہونا اک لازمی امر سا۔

”سنا..... کہ خبر ہے کرمیاں؟“

”جی حضور اسسٹنٹ فوڈ سپلائیز افیسر نی پوسٹ وراک مہینہ

پہلاں ہی جوائن کیتا ہے.....“ور.....!“

”ور کہ ووئے؟“

”مندراتہ بے رعباتہ پولاں لان آ لے نا.....سرکار!“

”تہ فر کہ ہے کر میاں؟ جا اُس نے پیو کی اج ہی نکاح ناسنیہا

وے.....جا اڈنا جا.....“ سیٹھ ہو رہے صبری نال بولے۔



باقی نے سو



شہر ازنی پھل تھیں نازک تہ ہونہار بچی کی دس سال فی عک
عمرے بچ ہی روزے رکھن نا بڑا چا سا۔ اک دن افطاری کرنیاں ہی
ٹھنڈے پانی نے گلاس سن اُس نے پیٹ بچ درد تہ مروڑ فی صورت پیدا
کی تہ اُس کی سُر نکوٹ ہسپتال لے جانا ضروری سمجھیا گیا۔

ہسپتال نے سارے ڈاکٹر غائب سن۔ آخر بڑی کوشش تھیں
بعد اک ڈاکٹر صاحب نے کوارٹر ور ہی بچی کی دہسیا گیا۔ ڈاکٹر صاحب
اپنے نسخے بچ او ہی دوائیاں تجویز کیتیاں جیہڑیاں انہاں نے کلینک
اندر موہو دسن۔ اجاں اک ہی گولی نا استعمال کیتا گیا سا جے بچی کی
ہسٹری کاہلی نال پرسیونیال تریلیاں آن لکیاں۔ بچی فی بیہوشی دہسنی سی
جے اُس نے معدے ور اس دوانا سخت بُرا اثر ہو یا ہے۔ دوائی

نی تصدیق ور پتہ ایہہ لگا جے ایہہ ساری دوائی نقلی سی تہ اس
دوائی نے پتے ور درج قیمت دوسو چرتالی روپیے، وراہہ نقلی کمپنی ایہی
پتا صرف بانی روپیہیاں پنج ڈاکٹر صاحبان کی مہنیا کرنی سی۔

”ڈاکٹر صاحب..... گجھ تہ انصاف کرو۔ تئس دوئے
جی ڈیڑھ لکھ روپیے مہنہ نی تنخواہ وی لینے ہوتے اُپر وں فیس نی پہناری
آمدنی وی ہے تہ فر اس طراں مرپھاں نال کھلواڑ کرن پنج کہ مزہ آنا
ہے.....؟ ماہری خوشبو نا کہ قصور سا جے اُس کی اس نیکی
عمرے پنج تئساں نقلی دوا دیتی ہمیشاں واسطے معدے نا رہن پھن بنائی
چھوڑیا۔“ شیراز رونے رونے کچھیا۔

”جا جا..... جتھے مرضی جا..... ڈاکٹر میں ہاں کہ
توں.....؟ ایہہ دوائی نا اک پتا اُپر توڑ کجیاں سوروپیہیاں نا
ہوئی جانا ہے، سوروپیہیاں نا.....“ ڈاکٹر لہرو وی کیتی تہ کھوہریاں
نظراں نال نال دندوی رکے۔



لحاظ دار



اج جنگلات نے سارے افسراں اپنے اپنے ماتحتاں تہ پولیس
 کی نال رکھی کمپارٹمنٹ نمبر ۳۵۲ بج کہن چکری مچائی فی سی۔ ساریاں
 مکاں نا اک اک ٹانڈا جڑوں ہٹی سٹیا۔ الاں، ڈبریاں، تریڑیاں،
 موٹھی، چینگناں تہ پڑولاں نیاں ساریاں بیلاں تروڑی تراڑی زمین
 داراں کی ایہہ دھسن نی کوشش کیتی جے محکمہ جنگلات نے افسراں نے
 کتنے پاور ہونے ہین نالے آئیندہ کوئے زمیندار ایہہ جرات نہ کری
 سکے جے اوہ جنگلات نے اک اینچ رقبہ وروی قبضہ کرے۔

ڈی ایف او صاحب.....! ایہہ چھ بڑے بڑے

ڈوگے وی تہ اسے کپار ٹمنٹ نے اندر پینے ہین تہ فصل وی تہ اسے سال لگی ہے۔ اس باقی لوک تہ اپنی اپنی زمی ور چالی سالوں تھیں قابض ہاں نالے اساہڑے انتقال محکمہ مال نے رپکار ڈ اندر موجود ہین۔
 “اک بُڈھے بڑی ہمت کری تہ کچھیا۔

”ایہہ تہ محکمہ مال ہی دہسی سکنا ہے جے ایہہ جنگلات نارقہ ہے یا کسے فی ملکیت؟ جتھے توڑی میں جانناں ایہہ تہ انہاں لوکاں زبیاں ڈوگیاں ہین جیہڑے کدے وی غلط کم نیہہ کرنے، عزت دار نالے لوکاں نے فیصلے کرنے آ لے تہ بہوں لحاظ دار“ ڈی ایف او صاحب بُڈھے کی اگے اک گل وی نہ کرن دتی۔



کرتوت



”ہنن تہ صحت ٹھیک ہے نا ڈار لنگ.....؟“

”جی ٹھیک تہ ہاں.....ور.....!“

”ور کہ.....؟“

”اسا ہڑی کسے گل نا پتہ تہ نیمہ لگا.....؟“

”پتہ لگن دیاں.....؟ فر تہ مرنا منظور..... فر وی

.....؟“

”فر وی کہ.....؟ کہ نقص ہے، دہسو تہ سہی۔“
 ”جنے نے کرتوت چنگے نیہ، تلو نا زمانے نال بدلنا پینا ہے۔
 نہ ڈانس نی محفل، نہ کوئے ہو راینٹر ٹینمنٹ، کہانی نا داند بنی چیناوی
 کوئے زندگی ہے.....؟“ اُس منہہ بشکی آکھیا۔



احساس



اوہ دوئے جگری دوست سن۔ دو سال پہلاں رضائے بوہٹی
سخت بیمار ہوئی تہ اُس نے علاج واسطے اُس کی ڈاکٹر اں چندی گڑھ
جانے نامشورہ دیتا۔

”حبیب..... یرا..... آکھنے تھیں سخت مجبور ہاں وراج
تواہڑے بغیر کس کی اپنے دے لے نا حال سناں تہ کس نال گل کبراں؟
تو ہی تہ ماہڑا اک ہمدرد ہیں“

”دہس تہ سہی..... بچھرائتاں کہ باہنا ہیں.....؟ کہہ
ہو یا دوئے دوستا؟“ حبیب رضائے موہنڈے ور ہتھ تھیری تہ ہمدردی
نا اظہار کیتا۔

”تواہڑی پھر جائی کی.....“

”کہہ پہر جانی پہر جانی لایا نا ہے؟ گل تہ کر۔“

”اوہ! تگی پتہ ہے نا کتتی بہمار ہے تہ ہُن ڈاکڑاں مشورہ دیتا ہے جے چندی گڑھ جانا پیسی۔ خرچے واسطے اک لکھ روپیاں نی سخت ضرورت ہے۔ ماہرے کول تگی تہ پتہ ہے جے پھٹئی کوڑی نیہ، ہوئی سکے تہ پنجاہ ہزار روپیے اُدھارے دتسی تہ اُس نی جان بچائی بچ کم تہ آ دوستا.....!“

قبر تیار سی..... سارے لوک چُپ چاپ تہ رضا وی قبرے نے سرہانے قبر نہنھے آلیاں کی گجھ آکھنا ہی چاہنا سا جے حبیب وراُس نی نظر پئی تہ اُس تھیں نہ جرن ہو یا ”آ آ! دوستا آ.....“ اج تو اہڑی پہر جانی اللہ کی پیاری ہوئی گئی ہے.....“

حبیب نا سر بُنھاں سا تہ اوہ کوئے گل نہ کری سکیا۔ شاید اُس کی اِس گلے نا احساس ہوئی گیا سا جے اوہ لکھ پتی ہوئی وی اک چگری دوست نا لے گما ہنڈی نے کم نہ آئی سکیا۔



عادت



اُس کی میں ہر روز سمجھائی سمجھائی تنگ آئی گیا ساں تہ فراک
سال گذری گیا اُس کی تکیاں۔

اج فر اوہ راتیں باراں بجے کدھرے ٹری گیا تہ فر دوے
دن یا ہراں بجے پہائی کمے نے نہ ہنڑے اگے گھٹلے بچ پیا نا لبھا۔

”تواہڑا سرفراز! تواہڑے کھڑا گورولا تہ ہوائی پئی
نی ہے، تہ توں اتھے گھٹلے بچ کہہ کرنا ہیں؟“ اک راہ ٹرنے آ لے غصہ
کیتا تہ اُس کی احساس دوان نی کوشش کیتی۔

لوکاں لوڑ لاڑ کیتی تہ فر اُس نے سرفراز نی لاش ٹینکی نے اندر
پانیے چچوں لبھی جس نا ٹھنکن راتیں اوہ شراب نی عادت پوری کرنے
واسطے لاہی دہنی گیا سا۔



ووٹ



پیو تہ پتر دوئے گراں نے دورے ورسن۔ الیکشن نی

مہم پورے زوراں وری۔

”پاپا ایہہ کیہنڑا جانور ہے.....؟“ پتر سن پیو کی کچھیا۔

”چپ کرووئے چپ کر“ پیو پتر کی سختی نال سمجھایا۔

”تکو نا پاپا.....! اگے تہ دوداند تہ اُس نے کچھے گنڈھا

جیہ لکڑی نے ڈنڈے نال کچھ لگا نا ہے ور کچھے وی تہ دوواں جگھاں

آلا کوئے جانور ہے پاپا.....؟“ پتر سن گارے بج

لہتھے نے پہائی کا کے واخ اشارہ کیہنا جیہنڑا اج نیکی لو ہی ایہہ قسم

کھائی آیا سا بے اوہ پوری زمی دندالی تہ ہی کہنڑا مڑی۔

”نا سمجھاتہ بیوقوف، چُپ رہو چُپ، ایہہ اسا ہڑے بڑے
 کم فی چیز ہے، ایہی اساں کی ووٹ دینا ہے ووٹ.....!“
 پیوسن بلیں جے پتر نے کئے بچ ایہہ گل باہی۔



نجات



ستر سال فی عمر پنج رمضان فی اُس ویلے کجھ سخت چہنکا لگا
جس ویلے اُس فی پنجتالی سالوں فی بوہٹی فی لاش اُس نے کہہ رے کول
منویں نے یوٹے فی ڈاہلی نال لڑکی فی لہی۔

”دوہاں بچوں کسے اک کی تہ نجات لہی گئی ہے“ پہہڑ بچوں
بہوں سارے لوکاں ایہوٹ لائی فی سی۔



پسند



”توں وی کوئے عورت ہیں.....؟ تک نا ماہری
 سیکریٹری..... نا لے عمران نی بوہٹی..... تہ نظر کر ہاں بلی
 واخ اوہ سلوئی..... اوہ..... اُس کوئے اگوساہ
 پنجی ترہہ عورتاں نے ناں گنی دہسے۔“
 ”اڑیا فکر کیاں کرنے ہو؟ تہس تہ ماہرے کولوں وی گئے
 گذرے نے لگنے ہو۔ میں تہ اک فقہرے نے بالے نے ملے نا اک
 مردوی نہ سمجھنی.....“ عورت بڑے فخر نال تہ تاڑ تاڑ جواب
 دیتا۔



پنج پنج سو



ساری رات سوچاں نے سمندراں نیاں لہراں سن اُس کی اپنی
چھوٹی اندر اسراں نہڑیا جے اوہ کئی واری بے ہوشی پنج دی پنج پنج سو
نے نوٹ بند نارہیا۔

”اپنا کہنر، ٹھکانا تہ پتہ تہ دہسی جا.....؟“ اُس آخری
وار اُس کی آکھیا۔

”کہنر..... لوکاں نیاں بلیاں منڈھ یا فر شڑکاں
نے کنڈے، ٹھکانا ہڑاسا رانج، جتھے رُوح آوے.....! میں

آزاد ہاں.....آزاد، پتہ ماہڑا تھے ٹساں جیئے مہربان لہٹی

جان تہ مجبوری پنج کم آن.....!“

اُوہ کچھلُو ہنڈیاں ٹرنی تہ چہرا کھیاں تھیں اوہلے ہونی تاڑ تاڑ

اسیہی جملے دہرائی رہی۔



سکھ ناساہ



پورے پنج سال بعد اُوہ امریکہ تھیں بال بچے سمیت پندراں
 دناں واسطے وطن آیا۔ سارے گرائیاں اُس نی آمدور خوشی منائی تہ اُس
 کی ملنے واسطے آئی ایہہ ثابت کری دہسیا جے اجاں اوہی پُرانا پیار تہ
 محبتاں نے ٹھنیر گرائیاں نے دِلاں اندر موجود ہیں تہ خدا کرے ایہہ
 رسماں، رہتاں تہ رواج ہمیشاں قائم رہن۔

”تساہڑے والد صاحب نظر نیہہ آنے.....؟“ اک
 بزرگ اُراں پراں چنگی طراں تکی تہ فرہچھیا۔

”دراصل جدوؤں نے اُوہوراں کی امریکہ بلایا ہے گجھ نہ

کچھ سکھ ناساہ ہندا ہے۔ امریکہ بچ اک بندے فی سخت
 لوڑ پینی ہے۔ کیاں جے اساہڑی تہ ہوئی پکھیرواں آلی
 زندگی.....! نیکی لونکو تہ خفتاں ویلے کہڑ مڑو تہ فرٹس ہی دھسو
 کہڑے فی صفائی ستھرائی تھیں مہنی رکھوالی توڑی.....؟“ اُس سن
 ساریاں گرائیاں کی بڑے فخر نال آکھیا۔



فرق



”تو اڄ پھناری شاری نیہہ پھیری.....؟ دہس تہ

سہی کہ گل ہے؟.....! چپ چپ کیوں ہیں؟“

”سسر..... سرجی..... ٹساں مگی بڑی گندی جگہ

تھیں اپنے پھناٹے شائڈے مانجھنے واسطے آنی بڑا احسان کیتا سا
ور!“

”تہ فر کہہ ہو یا.....؟“

”اڄ..... فر دل آکھنا ہے جے اُتھے تہ میں اِس

تھیں بہتر ساں..... بہوں بہتر“

”ایہہ کہ بکنی ہیں..... تیگی نیہہ پتہ جے کس نے
سامنے ایہہ گل کرنے نی جرات کیتی ہے.....؟ ہوش تو اہڑا قائم تہ
ہے نا.....؟“

”ہوش پالگل قائم ہے سر..... قائم..... ورا!“
”کہہ..... ورا؟“

”سر..... اُتھے تہ اُتھے بچ فرق ہے“
”فرق..... کیہڑا تہ کس گلے نافرک؟“

”سر اُتھے وی اُوہی گندگی تہ اُتھے وی اُوہی گند، فرق ہے تہ
صرف اس گلے نا جے اُتھے ہاروں، اُتھے نہ بیہاریاں پھیرنیاں تہ نہ ہی
پہناڈے مانجھنے.....!“ ایہہ گل آکھی اوہ دروازے بچوں
باہر نکلی گئی تہ فرکدے مڑی نہ آئی۔



داتہ پیچ



”تکو نا سارا کچھ ہون نے باوجود وی بیاہ نیہہ کرنا۔“
اک نو جوان سن مجے اندر کھلی جھئی گل کہیتی۔

”یرا توں ایویں چھلکیت نہ مار، سوچنا ہوسی جے خرچہ تہ ہوسی
ہی ہوسی ور پتر ماری ماری اگ کڈھسن.....“ وؤئے مشکوئی
پہری تہ بلیں جے جواب دتا۔

”کسے نی مجبوری نامخول تہ ہا ساکتھے نی شرافت ہے؟ نا لے
غپت اپمان نی قینچی ہے۔“ اک بڈھے مجلس پنج ساریاں کی سمجھایا۔
”زیم ڈوگی بندھی بندائی ساریاں پتران نے حوالے کری
چھوڑو.....!“ اُسے نو جوان منہہ مندا جیا بنائی آکھیا جس

مجھے بچ کدے کھلی چھٹی گل کیتی سی۔

”جے نہ بنڈاں تہ.....؟“

”چنگانہ ہوسی.....!“

”توں ہونا کون ہیں زِمی بنڈاں آلا.....؟“

”اس گل نا اس ویلے ماہڑے کول کہ جواب ہے.....؟ وقت

آپوں دہسی۔“

”بہلے کرو ووئے بنڈائی دمنو زِمی ڈوگی نیہہ تہ..... اجاں اک

ہی تھی آئی ہے..... اس تھیں پہلاں جے..... ہمت کرو

..... ہمت..... نیہہ تہ.....؟“ اُ سے

نو جوان ہمدردی نا اظہار کیتا تہ ساریاں پھرنواں کی اک مُٹھ رہی

اس جنگ کی جپتن نے سارے داتہ پیچ وی دہسے تہ فر ملک چہے لو آلا

تارا چڑھنے تھیں پہلاں ہی اپنے کھڑی گیا۔

ملک بمعنی آہستہ



فرصت



(۱۲۸ اگست ۲۰۱۱ء)

پہانویں اوہ تہیاری ناکھکا ماندہ ہونا سا ور راتیں دوئے پہنرا
 اُس نی چھاتی ور چڑھی اُس نے سپنے بچ ٹھنڈیاری جھیا باہنے سن تہ فر
 کدے اک تہ کدے دُوا اُس نے نِکے نِکے سوالاں نا جواب دیتی اُس
 کی خوش کرنے سن نالے اسرا انہاں کی سبق وی جلدی یاد ہوئی جانا
 سا۔

اُس کی کدے کدے ایہہ لگنا سا جے انہاں کی ایہہ ساریاں
 گلاں تہ ہمدردیاں یاد رہسن تہ فر جدوں اوہ بڈھا ہوسی تہ پہانویں اوہ
 انہاں نیاں چھاتیاں ور بھئی سوال تہ نہ کرسی فر وی باری باری بانہہ

پکڑی اندروں باہر تہ باہروں اندر آیا جایا کرسی تہ فر اُس نی
خوشی اشمان چھو سی اشمان.....! نالے اُس نے سپنے دوہرا ٹھنڈیار
پسی۔

اج اوہ اللہ نی مہربانی نال بڑے بڑے افسر سن، فرصت کہمٹ
تہ کم زیادہ، بانہہ پکڑنی تہ دُور نی گل ہے، سلام کلام نی فرصت وی
نیہہ۔



روزہ تہج



پیشی جیئے ویلے ستمی نے روزے آلے تہیاڑے اُس کی بدھ
 پنج ہزار روپیئے دیئی تہ اوہ بولیا ”رکھی ہتو بہوں دناں تھیں سوچنا ساں جے
 ٹساں ماہری گرداوری وی کیتی نالے انتقال رجسٹر ور وراثتی انتقال
 چاہڑیاں وی پورا اک مہینہ گذری گیا ہے..... پورا مہینہ..... تہ فراق
 مہینے ٹساں جے واسطے ٹری جانا ہو یا، زندگی نا کہ بساہ؟ ایہہ رٹ مٹکی مکائی
 جائے تہ چنگی گل ہے“ کر پے اگو وار ساریاں گلاں گرداوری صاحب کی گنی
 دھیاں۔

”روزے نی یت تہ جس ویلے کرو ہوئی جانی ہے، ور جے نا

کہ ہوسی؟“ گرداور صاحب گجھ سوچیا تہ فر
اپہمارے بولے۔

”جج تہ ہونا ہی ہے گناہ بخشان واسطے، نالے اجاں میں کیمہزاج
کری چھوڑیا.....“ تہ فر اُس کھتے گوبے پنج دتھے تہنیاڑی ساری نیاں
نکیاں موٹیاں رتماں موجود سن ایہہ پنجاں ہزاراں فی دتھی وی توڑی
چھوڑی۔



۔ توڑی یعنی جگہ نہ ہونے پر بھی زبردستی ڈالنا

کہنلا



لوکاں نیاں نظراں بچ اُس نے کُتے نا پھلنا پھلنا کنڈیاں
 ہارؤں چمھنا سا۔ اُنہاں کی ایہہ پتہ سا جے کتنا خوش نصیب جناں ہے
 جس نے آسے پاسے اپنے ہی اپنے! تہیناڑی ساری نا تھکیا ما
 راتیں چھٹ پیس اپنیاں نال ہسی کھیڈی اُس نے وجودگی چھوڑی
 اسراں نسا ہوسی جسراں گدھے نے سرے وروں رنگ۔

دلاں نے راز تہ اوہی جاننا ہے جس نے ہتھے بچ زندگی نی ڈور
 ہے وراُس نے چہرے نی کتاب غور نال پڑھنے ور کتاب نے ہر
 ور قے ور لفظ ”کہنلا“ موٹے حرفاں بچ لکھیا نا لیٹھا۔



آخری دیدار



”ہن تہ بے چارہ مری گیا۔ چھوڑ..... یرا..... چھوڑ سارا
 غصہ تھکی چھوڑ پہانویں گجھ وی سہی آخر تو اہڑا پیو تہ سا..... جا جا
 بہلا جا، کم از کم آخری وار منہ تہ تک.....“ ساریاں اُس کی اُس
 نے پہا پے نے مرنے در ہمدردی نا اظہار کیتا۔

”دل نیمہ مننا تہ فرٹساں نے سامنے زمانہ سازی چنگی نیمہ
 لگنی.....!“ اُس بلیں جے آکھیا۔

”اساں ساریاں جانا تہ مڑی اُتھے ہی ہے..... پہانویں کوئے سو

سال جیسے تہ فراتھے ملنیاں شرم نیہہ آسی جا..... اجاں وی موقعہ
ہے، جائی کری ہن آخری دیدار آخری.....“ انہاں فر اُس کی صلاح
دتی۔

تکلیاں تکلیاں شام ہوئی گئی تہ فر اُس ور مناں مٹی پرتی سارے
اپنے اپنے کہنراں ٹری گئے تہ اسراں اوہ ہمیشاں واسطے دیدار تھیں محروم
رہیا۔



پاگل



”بچہ..... بہوں تیز بخارتہ باہر بہوں ٹھنڈ..... کوئے
گرم گولی وہے تہ چاہ نال کھلائی اس بڈھی ماں نیاں ٹہیر ساریاں
دعاواں کہہنتی کہنن، ایہہ موقعے بار بار نصیب نہیہ ہونے.....؟“
”پہلاں تہ ایہہ دہس بڈھیئے جے تو اہڑی جرات کسراں ہوئی
اندر آنے نی.....؟ تہ فر نکل باہر تہ ناپ اپنا رستہ“ اُس
پاگلاں ہارؤں بڈھی کی در کیریا۔

نکی لواجاں دس قدم کھڑؤں دؤر گیا ہی سا جے بڈھی نی ٹرٹ
لاش ور نظر پئی۔ اندر نے آدم اُس نال کجھ گلاں کیتیاں تہ فر اُس نے
منہہ بچوں جیہی چانک نکلی جے اوہ ”پاگل“ اخوان لگی پیا۔



شان



اوہ بڑا امیر سا۔ غریب مسکین اُس نے بھیڑے آنے جانے
 رہنے سن۔ بلیں بلیں غریباں نا آنا جانا تھوڑا کہن کیا تہ کسے اُس کی صلاح
 دتی ”تکو نا..... اللہ سن تُساں کی نوازیا ہے..... دولت،
 شہرت، عزّت تہ ہر سہولت، سب کچھ بیشمار ہے۔ غریباں مسکیناں
 نے کم آو تہ اللہ برکتاں نازل فرما سی نا لے دولت بچ باہداوی ہوسی تہ
 فر بڑی گل ایہہ ہے جے اگلی دُنیا بچ تُساں کی اعلیٰ مقام حاصل ہوسی۔“
 اوہ شخص جس کدے اُس کی صلاح دتی سی اج فر اُس کولوں
 پُتھن لگا ”اتنی غریبی بچ اِس پروجیکٹر نا کہ کم؟..... سمجھ نیہہ آنی
 ایہہ پیسے کتھوں آئے تہ فر اِس حالت بچ وی کہ ضرورت سی اِس
 پروجیکٹر نی.....؟“

”میں پہانویں غریب ہوئی گیاں وراوہ شان جیہڑی
پہلاں سی اُس کی قائم رکھنے واسطے مگی ایہہ کرنا پیا“ اُس بڑی بے
شرمی نال جواب دتا۔

”اتنی رقم.....؟ تہ فر غریہی کہ ہوئی؟ ایہہ کوئے سمجھ
آن آلی گل تہ نہ ہوئی۔“

”باقی تہ زلزلے تھیں بعد ہوروں ہور سامان بیلنے رہے ور
میں اپنی شان قائم رکھن واسطے اک دکان پچوں پراجیکٹر چایا تہ نساں
ہویاں۔“



اگلی دُنیا



تساہڑے والد صاحب سن بیاہ کری ایہہ ثابت کہتا
ہے جے اُنہاں کی تساہڑا کوئے خیال میہہ.....؟ آخر عزت، شہرت تہ
غیرت وی کوئے چیز ہے؟“ اک دوست اُس کی تھوڑی پھوک دتی تہ
آپوں مُشکروائی پاسے ہوئی گیا۔

”اُمید تہ مگی وی نہ سی ور ہوئی وی کہ سکنا ہے.....؟ مرضی
نے مالک جے ہوئے، فر وی وقت ہی دہسی.....!“ اُس بلیں جے
سر بُنھاں کری جواب دتا۔

”اتنی کھلی چھٹی دیسو تہ ایہہ بُڈھے جے سر کھل ہوئی جان تہ
فر.....“ اُس فر دُکھنی رگ جگان نی کوشش کیتی۔

”ایہہ معاملہ کسے ہو رنال وی تہ ہوئی سکنا ہے۔ آخر دُنیا جے ہوئی تہ

فر اس دُنیا اندر جہن نے سامان کتنے ضروری ہین؟ ایہہ
 اساں کی سوچنا چاہی نا!“ اُس اس واری کھوہریاں جواب دتا۔
 اوہ فر گجھ آکھنا چاہنا ساور اُس سن ایہہ آکھی اُس کولوں جان
 چھڑائی ”میں کہنر بار چھوڑیا نا لے گل بات وی تہ ہُن
 توں کہ چاہنا ہین؟ اگلی دُنیا وی خراب کراں؟ واہ پہائی
 واہ!“ تنگی تہ میں اپنا دوست سمجھنا ساں دوست۔



تہذیبِ ناجنازہ



ساری عمر ڈنڈولاں، رولیاں، تانٹیاں، پھانڈیاں چمکھڑاں تہ
پنہ نیہہ کیہنڑیاں کیہنڑیاں آفتاں نیاں چھولیاں اندر کٹی تہ فروی اوہ
کدے نہ گھبرایا تہ نہ ہی کسے کی اپنی زندگی نی گل دہسی۔

”کوئے ہے.....؟ ذرا گل تہ سُنو، ادھروی تہ نظر کرو، تَس
وی تہ ماہڑی عمرے بَجسو.....! اوہ لوکو..... اوہ ششکو..... اوہ
جینو.....؟“ اُس اج پہلی وار اِسر اِں نیاں گلاں رڑے بزار
لوکاں کی سُنائی کیتیاں۔

”کہ گل ہے چا چا جی.....؟ دہسو تہ سہی؟

کیتیاں رونے ہو.....؟“

اک راہ ٹرنے نو جوان سن ہمدردی نال چُکھیا۔

”بچہ روواں رکیاں نہ.....؟ تگونا! اساہڑی تہذہب
 نا جنازہ.....! ماہڑی پندراں سالان فی تہی جس سن
 ماہڑی بانہہ پکڑی فی سی تہ مگی ہسپتال جو لیا سا، حالو حال دو وحشی باہنوا
 س بچوں پکڑی تہ دیہنہ دوپہری تہرؤئی مہنی گئے تہ سارے راہ ٹرنے
 آلیاں ماہڑی بے بسی وراک ذراوی ترس نہ کھاہدا۔“



کہن چکری



اوہ دوئے دریا نے ارار پاراک وڈے کی تکیاں تکیاں دریا
 نے کنڈے کنڈے اُتھے توڑی ٹرنے رہے جتھے توڑی دریا جائی گم نہ
 ہوئی جانا۔ تہ فر پتہ ہی نہ لگا کدوں سمندر نیاں چھلیاں اُنہاں کی اپنے
 اندر اسرا کہن چکری در چا ہڑیا جے نہ اکس کی دُوے ناپتہ تہ نہ دُوے
 کی اکس فی خبر.....!



احساسِ فی دُنیا



”مِگی دُکھ ایہہ نہیہ ہے جے تُساں کول اللہ فی دُتی نی
 دولت کتنی ہے؟ مِگی ایہہ وی ساڑا نہیہ جے تسا ہڑیاں گڈیاں کتنے
 پیسے تہیاری نے کمائی تہ دینیاں ہین؟ مِگی پریشان ہونے فی وی کوئے
 ضرورت نہیہ جے.....؟ اُس ہور بہوں گجھ گنی
 دہسیا تہ فر چھٹ پَس سوچی تہ بولیا، مِگی فکر صرف اتنی ہے جے تُساں
 کول ایہہ سارا گجھ ہوئی اس بچوں کسے کی کہ دیتا.....؟“
 اوہ بھڑایا..... تہ فر اکھیاں ملنے ملنے اٹھیا، اُس نے
 متھے نیاں تریلیاں دہسیاں سن جے اوہ کدھرے ستیاں ستیاں
 احساس فی دُنیا بچ تہ نہیہ سا گیکانا.....؟



سچنی سزا



”تُساں کی چنگا پہلا پتہ وی ہے جے ایہہ قبرستان ہے تہہ فر
 جہاں دوہاں قبراں نے اُپر اک دوئے واخ مُہنہ کری تہہ لتاں لمیاری
 تُس گلاں کرنے ہو ایہہ ماہڑے پہاڑے بہشتی تہہ اتماں بہشتن نیاں
 قبراں ہین۔ تُس ہی دہسو جے ہوسی کوئی اچھی اولاد دینی جیہڑی ماؤ پیو
 نیاں قبراں ور کسے نپاں لتاں ہون تہہ فر اوہ برداشت کرے.....؟“
 اُس عاجزی زیادہ تہہ لہر کھٹ کیتی۔

”ٹھپک ہے ہم.....!“ اُنہاں دوہاں اُس ویلے آئی
 گئی کیتی ورا ندر واندری اُنہاں ناکہ پلان سا ایہہ اوہی جانن۔
 ”آج یہاں تار بندی کس نے کی ہے اور کیوں؟“ اُنہاں دُوے دِن

لوکاں کولوں کچھیا۔

”جناب ایہہ اتھے نے جٹاں نا وراثتی قبرستان ہے، اساں کی تہ پتہ میہہ فروی لگنا ہے جے اس قبرستان نی بے حرمتی نہ وے، اسے واسطے انہاں بچوں ہی کسے باڑھ شاڑھ دتی ہوسی“ لوکاں بچوں کجھاں باڑھ دین نی وجہ دہسن نی کوشش کیتی۔

”سالے ہینڈ زاپ..... تہ فر اگو گولی اُس ناسپنہ چیری اُس کی سچ نی اتنی بڑی سزا دی گئی جے قیامت توڑی ہُن اوہ قبرستان بارے گل نہ کرسی۔



باڑھ نگلی گئی



بہوں دناں تھیں اوپرے جہیے لوکاں نا تہنیاڑی کہٹ تہ راتیں زیادہ
 آنا جانا سا۔ لوک دڑ کے نے، خوف زدہ..... ہوٹھ سکے نے،
 چپھاں گلاں کرن تھیں قاصر تہ فرائک کالا دور..... بہوں کالا۔
 اج دسویں تہنیاڑے اوہ اندرؤں نگلی اپنی ڈبے نی بلی وروں
 اپنے گراں نی چو کھٹی نظراں کری اپنے گرائیاں نی یاد بچ اتھرؤں ڈوہلنا
 ساتھ اک موٹی جھئی آواز سن اُس کی اتھرؤں سکان ور مجبور کیتا۔

”ادھر آؤ..... ادھر.....!“

”جی جناب..... حکم.....؟“

”باہر کیوں کھڑے ہو؟ پتہ نہیں کہ کیا ہو رہا ہے؟“

”جی ایہہ تہ ماہڑا اپنا کہتر ہے..... اپنا..... اج

دسویں دن باہر نکلیا ہاں..... اتناں ماندی تہ نیچے پھنکھے
 نہ آتا، نہ دال نہ پانی، مال بچھا پھنکھا.....؟ جاں تہ جاں
 کدھر.....؟

تُس ہی دہسو تہ فر انصاف کرو.....؟“
 اجاں اوہ گجھ ہو ر آ کھنے آلا ہی سا، تہ فر پتہ نیہہ رکیاں اُس کی
 اپنی ہی باڑھ نگلی گئی۔



مرنے دوغڈ ارتھا



ساریاں نے سامنے بے تحاشہ مار پینی رسیٹی، اُس نیاں
چانکاں اٹھان توڑی جائی پروردگار نے دربار بچ پتہ میہہ کھسڑی
کھسڑی رو داد سنایاں رہیاں۔

نہ ہی کوئے تیار ساتھ نہ ہی کسے کی ہمت سی جے اوہ ظلم کی ظلم
آکھے تہ اُس کی چھڑان نی کوشش کرے تہ فر اُچر توڑی اوہ چانکنا رہیا
بچر اُس نے ساہ بچ ساہ رہیا تہ فر اُس کی سارے ہلائی جلائی رہے ور
اوہ نہ بولیا تہ نہ بولی۔

”مرنے دوغڈ ارتھا“ اک جنڈھ نے پچھوں موٹی تہ اوپری
جہی آواز آئی۔



بڑے لوک



تہنیاڑی ساری پہناڈے مانجھی مانجھی راتیں اُس کی کوئے
 ہوش نہ رہنا سا۔ ہولی عمر تہ فر پہناڈیاں نا مانجھال، مانجھال ہووے
 وی رکیاں نہ.....؟ بڑا ہوٹل جے سا، تہ اوہ وی نیشنل ہائی وے اُپر۔
 ”پُتر..... پڑھسیں؟“ اک سماجی تنظیم نی سربراہ پُچھیا۔
 ”جی پڑھنے ناتہ بہوں دل کرنا ہے ور.....؟“

”میں پڑھا ساں، بس توں پڑھنے آلا بن تہ سہی!“
 اج اوہ خاصا سیانا وی ساتھ سوچ بچ فرق وی لیکھو لکھ کرنا
 سا۔ پتہ میہہ رکیاں تنظیم نی سربراہ اج اُس کولوں بے دلپلیاں
 پُچھیا ”لچھاتہ تہس پڑھی لکھی کہ بنسو.....؟“
 ”بڑے لوک، میم“ اُس اک دم جواب دیتا۔



ہند و جنگھ تہ مسلمان بانہہ



(۷ ستمبر ۲۰۱۱ء ساڑھے دس بجے دن بروز بدھوار)

اوہ دوئے فساد نے مارے، تھکے ماندے نالے فساد
 نیاں سٹاں یاد کری کری پچھتانی تہ بین ہی سن ور بدلہ لین
 نیاں سوچاں بچ زیادہ ڈبے نے دہسنے سن۔ اج انہاں نی کورٹ بچ
 پیش وی سی جس بچ اپنی اپنی صفائی وی دینی سی تہ شہادتاں صفائی تھیں
 زیادہ ضروری سن۔

پنڈت جی تہ مولوی صاحب اپنے اپنے طور انہاں
 دوہاں کی بیان رٹائی رٹائی کئی عواری رہپرسل کروائی تہ تاکہ کپہتی نی سی
 جے.....!

اوہ دوئے دوہاں لیناں بچ اپنی اپنی چٹ لینے واسطے
 اُتاو لے ہوئے نے سن، اک دُوئے کی کدے کدے لین

بچوں کھو ہریاں نظراں نال تنکا ثواب سمجھنے سن تہ کدے کدے
 اپنے اپنے مُونہاں ور ہتھ پھیری ایہہ ثابت کرن نی کوشش کرنے سن
 جے اندر جائی تکی ہنساں، کیہنڑا جتسی تہ کیہنڑا ہارسی.....؟
 بس ہُن چٹاں لہن ہی آلیاں سن جے اک بم تہما کہ ہو یا تہ
 فر.....؟ اوہ منظر کتنا دردناک سا اس نا اُنہاں دوہاں کی اِج
 احساس ہو یا تہ او زخمیاں تہ لاشاں کی چائی چائی ایسبولینساں بچ
 پھرنے رہے، تہ فر..... کھنڈ ریاں نیاں انسانی جنگھاں بانہواں
 کھنٹھیاں کری ہندواں تہ مسلماناں کی اُنہاں نی پچھان واسطے بلانے
 رہے ور کوائے وی ہندو جنگھ تہ مسلمان بانہہ نہ پچھانی سکیا تہ فراوہ اک
 دُوے نال چمڑی خاصے چھٹ رونے رہے۔ اِج اُنہاں نا انسانی
 جذبہ جاگی گیا سا تہ اوہ اک ہوئی گئے سن۔ پنڈت جی تہ مولوی صاحب
 کی اپنے اپنے کہنڑاں خوشخبری نی آس بچ پاسے پرتے پرتے اک
 مدت گزری گئی وراوہ اُنہاں نے ہتھاں نہ چڑھے تہ نہ ہُن چڑھسن۔



ڈائپر (Diaper)



اج اُس فی زندگی نے بانویں سال پُرے ہون وراُس نے
 دِلے بچ پتہ میہہ کیمڑے کیمڑے خیال آنے تہ جانے سن تہ فر
 اسراں لہنا سا جے اُس نے سامنے ساری زندگی فی فلم گہڑی گہڑی
 کوئے دہسی تہ فر مڑی نسی جانا ہے۔

”پہا پاٹساں کی ڈائپر لائیاں پُرے چھ گھنٹے ہوئی گئے ہین
 تہ اُپر وں نوں کدوں بجے اس نا پتہ وی نہ لگا، مگی سکول وی جانا ہے
 جے تساہڑی مرضی وہے تہ ڈائپر بدلی چھوڑاں.....! میں ہُن
 تساں کی پتہ ہے جے مڑیاں وی تہ چھٹی تھیں بعد ہی کدھرے

مڑساں، نالے اِج مہینے نی آخری تاریخ وی ہے ساریاں
رجسٹراں وردستخط کرنے پسن، ہوئی سکنا ہے جے پنج بجی جان نالے
تسا ہڑی نو نہہ رانی وی سکولوں دیری نال مڑسی۔“ اُس بڑی عاجزی
نال اپنے پہا پے اگے عرض کیتی۔

”پہا پاپا ایہہ تساں کہ کچتا.....؟ اجاں میں پہلا ڈائپہر لاہیا
وی نیہہ سا جے تساں فر پاجامہ خراب کری چھوڑیا۔ ہُن نہ ماہڑے کول
ٹائم تہ نہ ہی میں ڈائپہر بدلاں..... رہو و اِسے طراں تہ میں
جلیاں سکول.....“ پُتر ناراضگی نا اظہار کچتا تہ سکول ٹری گیا۔

”پُتر..... اِج جلدی کیاں مڑے ہو؟ خیر تہ ہے نا بچہ؟
اجاں تہ مساں باراں بجے ہوسن“ اُس نے پہا پے بڑی شفقت تہ اپنی
عمر نے تجربے نال پچھیا۔

”پہا پاپا اجاں میں سکول بچیا وی نہ ساں جے اندر نے آدم سخت
کو سیا جے تو.....!“

”نیہہ پُتر نیہہ پاجامہ تہ خاصا سکی گیا ہے، توں کیاں آیا

ہیں؟

جانبچہ سکول جا..... ماہڑا پا جامہ بلیں بلیں سارا سکی جاسی، مگی
 سؤل وی نیہہ.....“ اُس نا پہا پا ایہہ آکھی کجھ ہور سوچاں بچ ڈبی
 گیا۔



نتھ



اپنی دادی اماں فی نتھ نالِشکار اُس کی اتنا چنگا لگنا سا ہے اُس
 اپنی عمرے فی سپڑھی نے دسویں پاہنگے ور قدم تہر نیاں ہی اپنے
 پہا پے نال اتنی ضد کیتی ہے اپنے نلے بچ نتھ بہوئی تہ ساہ ہند اتہ فر کہ
 سا اوہ ہر روز شیشے اگے کھلی نتھ نے لشکار کی تکی تہ خوش ہونی رہی، اُس نا
 ایہہ پیار تہ ششکو شیریں فرہاد، سسی پٹوں، سوتنی مہینوال تہ لیلیٰ مجنوں
 نے پیار کی وی چکھے بہوں چکھے چھوڑ نا دہسیا۔

تکدیاں تکدیاں زندگی فی گڈی نا پتہ ہی نہ لگا تہ اوہ اسی

منزلاں طے کری وی نتھنا کھیہو انہ چھوڑیا بلکہ اُس نال پیار
تہنیاڑے تھیں تہنیاڑے بدھنارہیا۔

”دادی اتناں ہُن تہ نتھ لاہی چھوڑو، تہساں کی اِس عمرے بچ
ایہہ نتھ نیہہ سو بھنی، تگونا نئے ورنہ لڑکائی نی تہ فرایہہ عمر.....!“

دادی اتناں کی ساریاں تھیں نلکے پترے نے صاحبزادے صلاح دتی۔
”پتر..... اصل کولوں بیاز بلا شک بہوں پیارا ہونا

ہے ور کدے کدے سوچتی ہاں جے تو اہڑے کولوں وی مگی ایہہ نتھ
پیاری لگتی ہے، آئندہ کدے وی ماہڑے سامنے اِس نے بارے بچ
کوئے گل نہ کریاں ایہہ گل چنگی طراں گنڈھڑی بنھی رکھیاں پتر اچنگی
طراں“ دادی اتناں کھوہریاں گلاں بچ پوترے کی نصیحت کیتی۔

فرشتے سوال ورسوال کرنے رہے تہ دادی اتناں تاڑو تاڑ
جواب دینی تہ ہر گل بچوں پاس ہونی رہی۔ بچوں اک فرشتے طعنہ
ماریا ”نتھ کدھر گئی؟ تکیا ناتوں دُنیا تہ اُس بچ بسنے آلے لوکاں نا تماشہ
اپنیاں تہ بہوں اپنیاں نے کرتوت۔ جہاں واسطے پوہریے

کٹے، مصیبتاں تکیاں، مُشکلاں پوٹیاں، چہرہ کا چہلیاں تہ
 ماراں کھاہدیاں ورتواہڑی گجھاں رتیاں فی نتھ وی اُنہاں لاہی ہندی
 توں تہ اُنہاں کی وصیت وی کیتی سی جے اس کی کدے نہ لاہیو.....!“



ادّھا لفظ



اُس نے ساریاں تھیں نکلے پترے اُس کی پتہ میہ کہہ
 کچھ آکھیا وراُس ایہہ گل آکھی چپ لائی ”پترے..... تھس سارے
 پترے ماہڑے دِلے نے ٹوٹے جے ہوئے.....!“

اُسے نکلے پترے نی ریٹائیر منٹ وراُس نے اک
 پترے خورے رکیاں اُس کی وی چنگا مندا آکھیا تہ فر اُس وی اتنا
 جواب دیتا ”پترے تھس تہ ماہڑے دِلے نے ٹو.....“ تہ فر
 ”ادّھا لفظ“ ”لے“ اجاں اُس نے مونہیں بچ ہی سا جے اوہ منکر نکیر
 نے ٹہنا چڑھی گیا۔



در گور



دُنیا نے نقشے اُپر وں صدیاں نا تہنیاں گی
 زندہ در گور کرنے نارواج صدیاں پہلاں ہی مکی مکائی گیا ساتھ پتہ
 نیہہ رکیاں فر دُنیا نے نقشے اُپر تہنیاں گی زندہ در گور تہ نیہہ کرنے ور
 جمنے تھیں پہلاں ہی قتل کری در گور کرنے نارواج عام ہوئی گیا۔



دوہرا ڈاٹا مس



”گجھ وی کرو، ایہہ ماہڑی سلینڈراں نی کاپی نویں بنائی دیو۔

اج ترے تہنیاڑے ہوئے چولہے کی بجھیاں۔“

”کسر ابنائ مولوی صاحب؟“

”ہنی جاؤ راجوری، تہ ہور کسرا؟“

”ڈاٹا مس ہے، آئی۔ ڈی کھلسی، افسر دفتر بہسن تہ فر گجھ نہ

گجھ ہوئی سکنا ہے“

”میں آکھیا نا گجھ چپلہ چارہ کرو“

”اپنا واعظ یاد کرو“

”کہیڑ اتہ کدوں نا واعظ؟ اس تہ روز واعظ کرنے ہی رہتے

ہاں، ایہہ کوئے نویں گل ہے؟“

”پرسوں مجھے فی نماز تھیں پہلاں نا واعظ تہ ہور کیہڑا؟“

”موضوع کہہ سا؟“

”تساں آکھیا سانا، اوہ کہہ آکھنیں جے، لین دین کرنے آ لے

دوئے..... تہ فر واعظ نا اثر کہہ ہوسی؟“

”اثر ہووے یا نہ ہووے، ماہڑی ضرورت مکی مجبور کرنی ہے تہ

میں کہہ کراں؟“

دوئے دن سُنیا جے مولوی صاحب فی ڈائمس آلی کاپی بنے

تھیں پہلاں ہی اُنہاں نا اپنا ہی ڈائمس ہوئی گیا۔



واسطہ



اُنہاں بے رحم ہواواں تہ مشکل کہنڑیاں نالے پوہریاں تہ
 کھکھر توں جہمیاڑیاں، ڈنڈولاں تہ پھانڈیاں نیاں موج مستیاں،
 ظالم پلاں تہ مصیبتاں نے ریلیاں، پہنکھ تہ تنگ نیاں کالیاں راتاں،
 اپنیاں تہ پرائیاں نیاں ڈوہنگیاں چالاں، جبر تہ دبدبے نیاں تہر قیاں
 زور تہ زبردستی نے کالے چہنڑاں پٹھ گزاریاں ساعتاں، انسانیت
 نے ناں ور حیواناں تھیں وی اگے ہوئے ظلماں نے تکتے بے بسی نے

نظاریاں تہ فرِ اس حال بچ وی تہا ہڑے معصوم تہنیاڑیاں
 نیاں ان مٹ یاداں نے پل تہ کہڑیاں نیاں کلجے پینیاں ٹھنڈاں،
 خوشیاں تہ غماں نے رلے ملے جذباتاں، اکھیاں نے ٹھنڈیاں، دِلے
 نے ارماناں، سپنے نے سیکاں، اُمیدیاں نے آہنے بسانے نے
 خیالاں، خوشیاں تہ غماں نے رلے ملے جذباتاں تہ ہور بہوں سارے
 خیالاں، خواہشاں، سیکاں، ڈنجیاں تہ پتہ نہیہ کہڑے کہڑے دُنیا
 نے ہور جھنجھٹاں نا واسطہ دیئی تہ ہور مچ سارے ارمان سپنے دیئی اوہ
 شخص آخری گل کری ٹری گیا۔

”ہُن تہ بخشو ہیرا..... زندیاں نال چہنگوے، روسے، بے
 زاریاں، کھو ہریاں کھپریاں ہونا تہ ہور جو وی آکھو سو بھنا ہے، وراُس
 نال کہہ روسے، کہڑیاں بے زاریاں، کتھے نے چہنگوے جیہڑا آپوں
 بے بس تہ بے آسا ہوئی مناں ہامٹی پٹھ قیامت نادہنہ چڑھن توڑی
 اکھلیاں کالی شاہ کالی اگوتھی رات نے کھمّاں پٹھ سینے واسطے ٹری
 جائے.....“

ہلائی جلائی رہے، ہلائی رہے، مٹتاں تہ ہاڑے وی کیتے،
 نیازاں تہ نذراں نیاں ورسب چلے بیکار، سارے ہاڑے بے سود،
 ساریاں نذراں تہ نیازاں بے اثر..... تہ فرسوچاں نے سمندر سن
 اُنہاں ساریاں کی اپنی ڈوہنگی سوچ بچ گجھ کہنڑیاں سوچنے واسطے مجبور
 کیتا۔




دوگلاں



اللہ پاک نا لکھ لکھ شکر تہ احسان جس ماہری زندگی فی ایہہ
خواہش وی پوری کیتی تہ میں ”درد“ ناں نے اس افسانوی مجموعے کی
ٹساں فی خدمت بچ پیش کرنے نے قابل ہوئی سکیاں۔ مکی پوری
امید ہے جے سماج نے دہے دبائے، مظلوم تہ لستے نالے جبر نیاں
ماراں کھائی کھائی روڑ کھوڑ جیاں بچ نویں جان پیسی نالے جوان بچے،
بچیاں انہاں ماہریاں حرفاں کی پڑھی تہ گجھ نہ گجھ فائدہ حاصل کرنے
نے جتن کر سن۔

خدا کرے ایہہ ماہرے چلے، ہاڑے تہ سچے واقعات فی عکاسی
سماج فی گجھ نہ گجھ اصلاح بچ مدگار ثابت و ہے۔ آمین
دسمبر ۲۰۱۲ء..... شیخ آزاد احمد آزاد۔





➡ پہاڑی لکھاریاں کی اک راہ، اک سلک تہ اک مزاج دین آلا شیخ
آزاد (نثار راہی)

➡ آزاد صاحب پہاڑی ادب کے کرشن چندر اور مہندر ناتھ یا
سعادت حسن منٹو سے آنکھیں ملانے کی صلاحیت رکھتے ہیں۔ (نذیر قریشی)

➡ آزاد جتنے اک خوبصورت شاعر ہیں اُتنے ہی قدرت نے اُنہاں
کی نثر نگاری نی خوبصورتی نال وی نوازیا ہے۔ (ڈاکٹر فاروق انوار مرزا)

➡ افسانچہ یا منی کہانی لکھنا ہر کز سہل کم نیہ، مگر آزاد سن بڑی خوبصورتی
نال اس فن نال پورا انصاف کیتیا ہے۔ (رجہ نذر بونیاری)

